

東
華
續
錄

光緒一百四十七

臣朱壽朋敬編

臣汪錫增恭校

秋七月壬子朔時享 太廟 上親詣行禮○胡聘之奏准戶部咨議覆陝西巡撫臣魏光燾奏籌辦鹽斤加價一摺光緒二十四年四月初五日具奏奉 旨依議欽此鈔錄原奏咨行到督當經轉行河東道遵辦去後茲據該道詳稱據陝岸各民販公呈以陝岸行銷潞引自咸豐四年改運商爲民販初頗暢銷繼因遞加羨餘等項商力大困漸多歇業光緒四五等年奏案隨有陝引片紙不行之語嗣經裁除各費銷路始有轉機此從前加款礙課之明驗也近年所加之費如海防經費各省賑捐皆係隨課攤封無不勉力遵辦至加價一欸於二十年蒙准捐免後二十二年復奉另籌鹽斤加價隨課每引交銀二十四兩加以陝省包納鹽釐每引十二兩合計成本已較豫岸爲重若再每斤加價四文以每引三萬斤計之應加制錢一百二十千文比之額課一百五十兩不啻重加一倍民販資本有限多繳一引加價必少納一引正課雖云攤之於民而成本過重既難減價以敵私誰肯肯賤而食貴勢必私鹽充斥官引滯銷實於課額商情均有窒礙等情請奏明免辦前來臣查陝省此次議加鹽價係爲就地籌款起見如果有裨餉需

無礙商課斷不敢意存畛域故爲推諉無如潞鹽運銷陝省成本極重獲利甚微如該省包納釐金及前歲另籌加價皆係隨課攤封已屬不遺餘力今若每斤再加四文其勢萬不能支雖云准其長價取之於民而陝岸私鹽甚多如甘省之花馬池鹽蒲城之酒泊灘私其價或僅止十餘文小民貪賤買私趨之若鶩卽減價尙難與敵況加價何能出售縱使緝私認真而能杜鄰境之私販斷難禁本省之私鹽勢必浸淫日多官引愈滯商力愈疲且陝豫兩岸並無長商皆係散販有利則爭趨無利則停貿自前年豫省加價三文至今各販歇業者已四十餘家本屆清綱頗形棘手茲陝省復議加價比較正課幾與相埒向之可購二引者今只能購一引該販等無力賠墊必更紛紛閉歇是陝省所得加價固屬無幾而潞商應完額課必至有虧查河東鹽長價指撥甘餉近復擬還洋債萬一微不足數更恐有誤要需詳加體察陝省加價一事實於潞綱大有窒礙惟有籲懇 天恩飭令停辦不但體恤商艱亦可保全國課矣下戶部議奏○甲寅魏光燾奏陝省分設文武學堂需費甚鉅請飭催河南山東江甯各督撫前借陝庫款迅速籌解以濟要需得 旨卽著該撫分別咨催如數籌解○魏光燾奏甯羌各州被水被火被雹分別賑撫得 旨知道了卽著飭屬認真撫卹毋任失所○丙辰諭孫家鼐奏京師創辦學堂請爲獎勵等語戶部郎中王宗基等於五城地面集賢設立會文堂講求中西實學洵屬留心時務造就人材著傳旨嘉獎餘

依議○諭總理各國事務衙門代奏工部主事康有爲陳請興農殖民以富國用一摺前經迭諭各省整頓農務工務商務以冀開闢利源各處辦理如何現尙未據奏報萬寶之原皆出於地利日闢則物產日阜卽商務亦可擴充是訓農又爲通商惠工之本中國向本重農惟向無專董其事者非力爲勸導不足以鼓舞振作著於京師設立農工商總局派直隸湖北道端方直隸候補道徐建寅吳懋鼎等督理端方著開去湖北道缺同徐建寅吳懋鼎均著賞給三品卿銜一切事件准其隨時具奏其各省府州縣設立農務學堂廣開農會刊農報購農器由紳富之有田業者試辦以爲之率至工學商局各事宜亦著一體認真舉辦統歸督理農工商總局端方等隨時考查各省卽由該督撫設立分局遴派通達時務公正廉明之紳士二三員總司其事所有各局開辦日期及派出辦理之員並著先行電奏此事創辦之始必須官民一氣實力實心方可漸收成效端方等各該督撫等務當體朝廷振作之心考求新法精益求精庶幾農興而生殖日蕃商業盛而流通益廣以植富強之基朕有厚望焉○諭前江西巡撫德馨著開復頭品頂戴花翎賞給布政使銜會同翰林院編修黃鐸辦理奉天礦務○諭總理各國事務衙門奏遵議廖壽豐奏請飭出使各國大臣督同領事各就寓洋華人一體建立學堂一摺外洋各埠僑寓華民衆多羣居雜處不乏可造之材亟宜創立學堂訓以中西文字以廣教育著該

大臣等體察情形妥爲勸辦擬定章程詳晰具奏另片奏請由使館編譯外洋書籍等語編譯泰西書籍以考證政治得失自是目前要圖羅豐祿慶常伍廷芳熟於英法文字就近購譯尤爲便捷著卽選擇善本詳加編譯務令中西文義貫通陸續譯成由總理衙門呈覽○丁巳諭張汝梅奏黃河伏汛盛漲上下兩游漫溢並濟陽縣屬之桑家渡等處先後漫溢自請議處各摺片本年六月二十一日山東黃河上游南岸黑虎廟漫溢溜至壽張鄆城兩縣地界穿運河東洩壽張縣楊家井臨安堤漫溢平地水深盈丈被淹四百餘莊中游歷城南岸楊謝道口民埵漫溢濟陽縣屬之桑家渡大堤漫溢成口刷寬十五六丈深二丈餘東阿境內王家廟漫溢十餘丈其餘東阿東平肥城長清各境內亦漫溢多處此次山東黃河上下兩游迭報失事總辦河工道員丁達意等未能先事預防著該撫查明確切情形另行奏參張汝梅著交部議處現在秋汛方長仍著該撫督飭在事各員認真防護毋得再有疏虞餘著照所議辦理該部知道○文海奏奴才昨將達賴呈進方物叩謝 天恩各情代奏業經恭奉 硃批欽遵在案前准軍機大臣字寄光緒二十三年十二月二十日奉 上諭恭壽奏瞻對蒙恩賞還該達賴自必感激竊恐番官返巢挾嫌報怨尤肆苛虐現雖飭候補道慶晉妥爲撫馭而番官係由達賴統率恐非漢官所能鈐束請飭文海等就近與達賴約定善後辦法等語自係爲懲前毖後起見文海等身爲駐藏大員恭壽所奏情形

想亦解度及此卽著與達賴嚴定約章取其慎選番官不再苛虐侵擾確據以期永遠相安並著傳諭達賴嗣後番官等倘再滋生事端定惟該達賴是問原片著鈔給閱看將此由五百里各諭令知之欽此遵旨寄信前來奴才當卽恭錄譯知達賴去後旋據噶布倫等來署面稱瞻對地方既蒙 聖恩許還達賴自當慎選番官卽赴該處接收任事至出具確據一層恐滋瞻民口實等語經奴才嚴加申飭並諭以朝廷德意不過爲慎重地方撫恤百姓起見爾達賴竟敢不遵殊難代奏結案該達賴無可如何始具信字前來譯稱 諭旨內開嗣後番官等倘再滋生事端定惟達賴是問一節自應確遵辦理等因並遞來約章一紙原載五條譯語間有支離復經奴才刪定共計四條大意約束番官不准侵擾苛虐亦屬遵旨辦理又據交來奏書一合吉祥哈達一方奴才飭令譯出原文尙無違礙字句查瞻對一案先經四川督臣鹿傳霖以兵力收取嗣經恭壽奏請奉 旨賞還 聖朝寬宥之仁蠻貊亦各感激惟番情動多疑慮其結不肯切實奴才以爲業經加 恩賞還達賴已具信字遵定約章不敢違 旨似未便過事追求應請 飭下四川督臣就近派令候補道慶習交代瞻對地方一面仍由奴才咨行達賴卽派妥慎番官赴瞻戍守不准再滋他事倘番副到瞻之日有藉口捏詞等事委員卽毋庸交給地方俟說清再行了結不必上勞 宸慮也 上諭文海奏遵有嚴定瞻對約章取其達賴確據繕單呈覽一摺瞻對地方前

經降旨諭令文海與達賴嚴定約章宣布朝廷德意茲據該大臣將約章復行刪定辦理尙爲妥協
卽著恭壽迅派道員慶喜前往交代仍由該大臣咨行達賴慎選番官赴瞻戍守毋致滋生事端至章谷
朱滿瞻對三處屯官應卽一律撤去用示開誠布公撫綏衛至意該衙門知道○諭御史張承繼奏川
省昭信股票苛派擾累請飭妥辦一摺前因各省昭信股票不無擾累情事迭經諭令妥爲辦理不准稍
有苛派若如該御史所奏川省辦理此事擾累閭閻與購辦股票任意樂輸之初意大相刺謬著各該處
飭所屬懷遵迭次諭旨慎防滋弊不准抑勒一面確切查明各該地方官倘有藉端騷擾情事卽著從嚴
懲辦昭信股票惟直隸辦理尙屬妥協該督應卽咨取該省章程妥籌辦理已革知縣賈秉更委辦股票
有無苛派並著據實覆奏毋稍迴護○諭巡視南城御史吳壽等奏拿獲銷燬永定門銅礮人犯請交部
審辦一摺所有拿獲之陳金海張殿英王發子靳廣盛馬莊狗杜清和等六名著交刑部嚴行審訊按律
懲辦其莊三一名前因偷竊樹木解送刑部尙未訊結著一併歸案覆訊未獲之李京寬一犯仍著嚴緝
務獲究辦該衙門知道○戊午 上幸頤和園詣 慈寧端佑康頤昭豫莊誠壽恭欽獻崇熙皇太后前
請安駐蹕○己未 上還宮○諭前經諭令各衙門刪定則例並令各堂將飭司員限期速辦現在已將
匝月著各衙門將辦理情形先行具奏○諭整軍經武爲國家自強要圖現當參用西法訓練各軍尤宜

及時校閱以振戎行現擇於九月初五日朕恭奉 慈禧端佑康頤昭豫莊誠壽恭欽獻崇熙皇太后慈輿由西苑啟鑾詣南苑舊宮駐蹕初六日由舊宮詣新宮駐蹕初七日由新宮詣團河駐蹕初九日閱視御前大臣等馬步箭除奕劻管祺毋庸預備外其御前乾清門行走侍衛等或步射或馬射著先期自行報明以備屆時閱看初十日閱視神機營全隊操演十一日閱視武勝新隊操演十五日自團河啟鑾御輪車由鐵路詣天津行宮駐蹕二十五日回鑾其天津應行預備各項操演著俟駐蹕南苑時聽候諭旨所有應辦事宜著各該衙門參酌成案敬謹辦理○諭張之洞等奏沙市客民細故肇釁焚燬關局延燒華洋房屋獲犯訊辦一摺本年閏三月間沙市地方因湖南幫客民與招商局吏夫滋事焚燬關局同船延燒華洋房屋經該督撫委員會同地方官查辦先後拿獲首要各犯現據訊明擬結此案該客民等因細故肇釁輒敢糾眾放火焚燬房屋實屬目無法紀除情節最重之余以仁李得勝張泰興袁輝煌等四犯業經訊明正法外所有聽從滋鬧之易跋即易成應等及倚勢行兇之吏夫周順興均著照所擬分別監禁枷杖招商局董同知銜候選知縣張鴻澤袒護吏夫致釀巨案南幫首事從九品職銜楊明階於該幫糾眾滋事不能約束著一併斥革永不准投効軍營吏名捐復並卽行驅逐回籍毋任逗遛管帶沙防營勇總兵江得意近駐該鎮於匪黨滋事不能彈壓解散著以都司降補哨官游擊李鑑心把總池士祥

等均著卽行革職江陵縣知縣劉秉絳甫經到任事起倉猝驟出巨案雖據將首要各犯拿獲多名究屬防範不嚴著降一級留任管帶荆江水師副將張國棟因所帶各船一時難於調集尙非保護不力著俟補官日降一級留任以示懲儆至英日兩國公館洋行損失貨物業經該監督會商各該幫首事分別賠補沙市關稅務司燬失衣物亦著另行補給嗣後仍著該督撫嚴飭該地方官遵照五月二十四日諭旨凡通商各埠地方尤當實力保護毋任以薄物細故輕啟釁端倘再疎虞定將該管各官從嚴懲處餘著照所議辦理該衙門知道○庚申諭御史楊福琮奏武科章程宜合學堂營制科舉爲一事一摺著兵部歸入變通武科事宜一併妥議具奏○諭剛毅奏提訊放漢郡王達木林達爾達克被參案件謹就現辦情形先行擬結一摺茲據理藩院奏放漢郡王達木林達爾達克呈稱赴熱河聽候傳質惟恐冤抑吳仲請派員訊辦當諭令榮祿剛毅確切研訊據實具奏茲據剛毅奏稱訊據案犯各供該郡王所遞供詞其中疑竇滋多自非俾集證佐四面環質不足以成定讞惟烏拉白依一犯迭經嚴催尙未到案李長安等犯該管各官紛紛稟報病故脫逃無從質訊請先行擬結等語放漢郡王達木林達爾達克於傅思文一案雖係奉天派弁往緝並無縱令殺害情事惟所派弁兵鎗斃多命該郡王不能約束致釀重案實屬咎有應得著交理藩院議處其餘要證並著該都統查明指名參辦李長安烏拉白依趙秀仍著暫監理藩

院轉飭迅速解送訊辦餘依議該衙門知道○辛酉諭近來朝廷整頓庶務如學堂商務鐵路礦務一切新政迭經諭令各將軍督撫切實籌辦並將辦理情形先行具奏該將軍督撫等自應仰體朝廷孜孜求治之意內外一心迅速辦理方為不負委任乃各省積習相沿因循玩愒雖經嚴旨敦迫猶復意存觀望卽如劉坤一譚鍾麟身任封圻於本年五六月間諭令籌辦之事並無一字覆奏迨經電旨催問劉坤一則藉口部文未到一味塞責譚鍾麟且並電旨未覆置若罔聞該督等皆受恩深重久膺疆寄之人泄沓如此朕復何望倘再藉詞虛延定必予以嚴懲直隸距京咫尺榮祿於奉旨交辦各件尤當趕緊辦理陸續奏陳其餘各省督撫亦當振刷精神一體從速籌辦毋得遲玩至于各屬○諭貴恆奏查明扎薩克鎮國公呈訴被參各節並無冤抑又該公盜取印文私借銀兩請飭歸案解臺訊辦各摺片前扎薩克鎮國公阿育爾色德占扎木楚在理藩院呈訴被參冤抑曾經諭令貴恆到任後確查具奏茲據奏稱該鎮國公被參案所苛派及私赴庫倫各節均係實有其事並無冤抑顯係飾詞呈訴圖洩私憤阿育爾色德丹占扎木楚前已革去盟長並扎薩克之任著交理藩院照例議處至該公盜取印文私借銀兩既據該台吉呈控自應切實追訊據稱該公現仍在京並未回旗聽候查辦著理藩院查明該公因何在京逗遛趕緊解送烏里雅蘇臺以便訊辦餘著照所議辦理該衙門知道○諭翰林院奏編修陳鼎進呈校邠廬

抗議別論四十八篇據呈代奏一摺該編修所呈論說其中有無可採之處著軍機大臣會同總理衙門王大臣悉心閱看妥議具奏○諭孫家鼐奏舉人梁啟超請設立編譯學堂准予學生出身並書籍報紙悉免納稅據呈代奏一摺該舉人辦理譯書事務擬就上海設立學堂自爲培養人才起見如果學業有成考驗屬實准其作爲學生出身至書籍報紙一律免稅均著照所請行該衙門知道○黃卓元病請解任允之○張汝梅奏以前以東省水利失修有妨農政迭次委員分赴各屬會同地方官詳細查勘於河道之應疏濬溝渠之應通開者分別認真舉辦以興水利而重農工曾經恭摺具奏在案正在督飭籌辦間伏讀五月十六日上諭農務爲富國根本亟宜振興各省可耕之土未盡地利者尙多著各督撫督飭各該地方官勸諭紳民兼採中西各法切實興辦不准空言搪塞須知講求農政本古人勞農勸相之意全在地方官隨時維持保護實力奉行如果辦有實效准該督撫奏請獎敘等因欽此跪誦之下欽感莫名竊維通商以來逐末者多務本者少民生日困民氣益鬱謀有以補救之自莫先於厚生計欲厚生計自莫先於重農功而重農功則又非先興水利不可東省水利不興河患日亟不但黃河高於平地一經漫溢勢若建瓴瀕河之民舍農田時有漂沒之患又如黃河以北則有高津馬頰徒駭諸河黃河以南則有泇沂汶泗諸河東則有膠萊濰淄西則有濮衛濟汜其利害皆與黃河相維繫者也而各屬之波澤

湖泊以支流而達於河者亦互相維繫於其間體察現在情形各河年久失修河身有因積沙而淤高者亦有因頂溜而刷深者深則積淤高則斷流水道通塞不常既無以廣利涉之益溝渠壅塞弗治更無以收蓄洩之功遇霖雨則山溪之間莫不被其淹決逢亢旱則高原之地不能資其引溉農田民舍往往棄於浮沙積水之中耕稼失時行旅阻遏其爲困苦殊堪憫惻頻年議調議賑無補民之生計以之艱欲興水利必先有以祛其害擬將各河淤塞處所淤者深之狹者廣之積水之區概爲築築沙壓之地一律修復應開支河者則開支河以分其流應修溝渠者則修溝渠以通其道通其道則平地之水有所歸分其流則溝渠之水有所洩雖過漫溢仍可山溝渠而達於河由河而注之海河渠能多洩一分水平地即少受一分災其爲害於民舍農田者可因之而紓矣害紓而利自興則凡引泉築堰開塘濬河培堤之有利於農政者亦可次第舉辦查泰西各國惟英美擅工商之利德法奧意諸國其大利皆在於農而所以資其利者惟用機器以代工作藉化學以辨土宜與中國現行農政微有不同其餘如開溝鑿井置車戽石以及所用排水蓄水諸器亦無非以興水利爲農政本源損益變通惟在官吏有以爲民圖其始樂其成耳現據各印委陸續稟報所有各屬應疏河道已次第查勘應開溝渠亦已一律勸辦惟事在創始頭緒紛繁非遴派得力大員督同經理不足以一事權而收實效茲查有候補道積慶諳練老成辦事實

在於東省各屬河道地勢無不周知堪以委派督辦水利現於省城設立總局局中應支經費悉令會同開支其應辦水利一切事宜卽責成該道會同藩臬兩司及各該管道府督飭印委各員董勸民間認真舉辦如果辦有實效能藉以振興農政者應卽遵旨擇尤奏請獎敘其有奉行故事藉端擾民者亦卽隨時指名嚴參以仰副朝廷重農恤民務本足國至意下戶部知之○壬戌徐致祥奏臣恭讀六月初一日電譯上諭張之洞陳寶箴奏請飭妥議科舉章程一摺據該督撫等稱擬爲先博後約隨場去取之法著照所擬鄉會試仍定爲三場第一場試中國史事國朝政治論五道第二場試時務策五道第三場試四書義兩篇五經義一篇首場按甲額十倍錄取二場三倍錄取取者始准入次場每場發榜一次三場完畢如額取中其學政歲科兩考生童亦以此例推之先試經古一場專以史論時務策命題正場試以四書五經義各一篇禮部卽通行各省一體遵照等因欽此仰見我皇上於科舉一事斟酌至再不厭求詳凡職司學校者靡不仰體同欽願督臣張之洞等原奏雖請歲科生童兩試以鄉會試例推而擴內第陳大略未詳及辦理之法臣謹就管見所及爲我皇上陳之經古一場專以史論時務策兩門發題較之詩賦自爲切實有用惟經古之名不改則策論之試不專何則向來經古場生童報考者閭閻不過數百人故取進之童前列之生不惟錄取經古者始能入選此次改詩賦爲策論原期人文之蔚起

以濟時事之艱難自宜慎重遴選若仍經古之名願者來不願者聽一如從前考試之例臣竊恐詩賦之門雖廢策論之效未收似莫若改經古場爲頭場試以史論一道時務策一道改正場爲二場試以四書五經義各一篇童試頭場先行出題一次錄取者准入二場如鄉會試例合頭二場參觀互證擇其學問淹通義理純正者如額取進倘有文不及額之處仍照例任缺無濫至於頭場所取不必拘定倍數總以文風高下人數多寡爲斷是在衡文者酌而行之此臣擬例推童試新章之辦法也若歲科兩考生員場數去取亦照此例等第一仍其舊二場試畢先將一等生員出團覆試後卽將一二三等卷按照向章發提調官分別榜示其頭場未經錄取之卷均附三等後以示區別如頭二場有離經叛道狂誕悖謬之談者歲考重則降革輕則不准申送科試錄遺此臣擬例推生童試新章並量予激勵之辦法也至生童經古場向有報孝經論性理論者或報算學者仍擬准其於頭場報考作爲首藝再加時務策一道亦以優劣爲去取二場既有經義經解自可停止如是則無畸輕畸重之偏庶收有體有用之效可否請 旨將臣所擬各節飭下禮部詳細妥議速行覆奏候 旨定奪如蒙 俞允應請 通諭各省學臣一體遵行統自明年科考爲始俾文移札飭生童肄習均得從容就理其四書義經義必須限以字數生童覆試首藝或史論一道或時務策一道次藝或四書義一篇或經義一篇以及生員歲科兩試有頭場已取而二

場臨點不到並二場臨期呈報患病不能終場者應如何分別辦理之處一併請 旨飭部詳議頒行又
奏我 朝以制藝取士首正文體故 高宗純皇帝欽定四書文一以清真雅正爲宗俾士子有所矜式
今欽奉 諭旨改試四書義五經義文格與制藝迥別應試生童多未寓目操觚率爾深恐不合體裁可
否請 旨飭令上書房南書房或部院大臣精選歷代及 國朝名儒名臣四書五經講義若干卷恭呈
御覽祇候 欽定刊刻頒行則應試者既遵循有自衡文者亦去取有資正文體卽以端學術端學術
卽以正人心杜邪說拔真才其關係於國家治亂安危之故者匪淺鮮也 上諭徐致祥奏歲科兩試請
照鄉會試新章分場去取一摺著禮部議奏另片奏請飭精選歷代及國朝四書五經講義刊刻頒行等
語先儒講義各書皆有刊行善本著卽由各省學政自行擇尤編選頒發生童俾有遵循而資講習
○諭朝廷振興庶政凡交議交查各件皆係當務之急各督撫等自當仰體朕懷各就地方情形認真妥
辦隨時具奏乃本年六月以前所有明降諭旨及寄諭並電旨飭辦各件未經覆奏之件尙多總由疲玩
因循不知振作著各該將軍督撫卽將以前飭令議奏之件迅速具奏以後奉諭交辦之事尤當依限趕
辦剋日奏聞毋得任意延緩致降旨嚴催嗣後明降諭旨均著由電報傳知各省督撫卽行遵照辦理無
庸專候部文以杜其藉口延誤○諭御史王培佑奏變法自強當除積弊習一摺現因時事多艱朝廷

振興庶務力圖自強尤賴樞廷及各部院大臣共爲樂忱竭力匡贊以期挽救頽風庶事可漸臻治理乃諸臣中恪共官守者固亦有人而狃於積習不知振作者尤難悉數卽如部院官本應常川進署不得無故請假議奏事件不准延擱逾期皆經再三訓誡而猶陽奉陰違似此蒙蔽因循國事何所倚賴茲特重加申儆所有在廷大小臣工務當洗心革面力任其艱於應辦各事明定期限不准稍涉遲玩倘仍畏難苟且自便身圖經朕查知定必嚴加懲處毋謂寬典可屢邀也○癸亥 上幸頤和園詣 慈福端佑康頤昭豫莊誠壽恭欽獻崇熙皇太后前請安駐蹕○榮祿奏查明福靖兵船在旅順口外遭風失事官兵水手人等生存僅有四人報聞○諭劉坤一奏辦理義賑出力之紳士請旨嘉獎等語上年徐淮海等屬被水成災經劉坤一會商盛宣懷派候選教職嚴作霖等周歷災區次第賑恤地方賴以安帖實屬急公好義有裨大局嚴作霖等均著傳旨嘉獎大理寺少卿盛宣懷籌辦賑務委任得人著一併傳旨嘉獎○甲子 上還宮○諭廣西會匪滋事迭經諭令黃槐森督飭各營迅速剿辦前據奏報屢獲勝仗攻破賊巢乃數月以來尙未能殲厥渠魁悉數撲滅所稱迭有擒獲雖保無捏報邀功情弊該撫因循貽誤實屬咎無可辭黃槐森著卽摘去頂戴迅督各營勒限一箇月將會匪一律掃蕩如再不知振作令蔓延日久貽害地方必當加以重譴懷之○諭陳寶箴奏邊保人才開單呈覽一摺湖南候補道以獻銘試用道黃

炳離降調前內閣學士陳寶琛內閣候補侍讀楊銳禮部候補主事黃英采刑部候補主事劉光第廣東候補道楊樞試用道王秉恩江蘇試用道歐陽霖江西試用道惲祖祁杜俞湖北候補道徐家幹江蘇候補道柯逢時湖北試用道薛華培候補道左孝同以上各員在京者著各該衙門傳知該員預備召見其餘均由各該督撫飭知來京一體預備召見○諭少詹事王錫蕃奏請飭各省設立商會於上海設總商會等語現在講求商務業於京師設立農工商總局並諭令劉坤一張之洞先就上海漢口試辦商務局擬定辦法奏聞現尙未據奏到商會即商務之一端著劉坤一等歸案迅速妥籌具奏其沿江沿海商賈輻輳之區應由各該督撫一體查明辦理所有一切開辦事宜並著總理各國事務王大臣咨商各督撫詳訂章程妥爲籌辦○諭張英麟奏巡捕因瘋自縊家屬藉端挾制請歸案審辦一摺據稱上年十二月間該學政按試正定巡捕邵昌熙自縊一案迭經臬司飭委臬員傳案訊詰乃近日風聞邵昌熙兄弟聽人唆使來京意存挾制等語此案實在情形著交刑部提案審明具奏○諭少詹事王錫蕃奏敬保通達時務人才一摺福建興泉永道周道業經電諭飭令來京預備召見現尙在籍之四川候補道沈翊清北洋差委候補道嚴復著邊寶泉榮祿飭令該員等來京預備召見內閣候補中書林旭著該衙門傳知該員預備召見○乙丑 上詣瀛秀園門恭迎 慈禧端佑康頤昭豫莊誠壽恭欽獻崇熙皇太后還宮○

論國家設官分職各有專司京外大小各官得制相沿不無冗濫近日臣工條奏多以裁汰冗員爲言雖未必盡可准行而參酌情形實亦有亟當改革者朕維授事命官不外總核名實現當開創自度事務繁多度支歲入有常豈能徒供無用之冗費致礙營務之急需如詹事府本屬閒曹無事可辦其通政司光祿寺鴻臚寺太僕寺大理寺等衙門事務甚簡半屬有名無實均著卽行裁撤歸併內閣及禮兵刑部辦理又外省如直隸甘肅四川等省皆係總督兼管巡撫事惟湖北廣東雲南三省督撫同城原未劃一現在東河在山東境內者已隸山東巡撫管轄祇河南河工山河督專辦今昔情形確有不同著將督撫同城之湖北廣東雲南三省巡撫並東河總督一併裁撤均著以總督兼管巡撫事東河總督應辦事宜卽歸併河南巡撫兼辦至各省清運多由海道河運已屬無多應徵漕糧亦多改折淮鹽所行省分亦各分設督銷其各省不辦運務之糧道及向無鹽場僅管疏銷之鹽道亦均著裁撤歸各藩司巡守道兼理此外如各省同通佐貳等官有但無水利鹽捕並無地方之責者本屬閒冗卽著查明裁汰除應裁之京外各官本日已降諭旨暨裁撤之巡撫河督京卿等員聽候另行錄用外其餘京外尚有應裁文武各缺及一切裁減歸併各事著大學士六部及直省督撫分別詳議趕辦仍將籌議情形迅速具奏內外諸臣卽行遵照切實辦理不准藉口體制攸關多方阻格並不得以無可再裁敷衍了事至各省設立辦公局所

名目繁多無非爲位置閒員地步薪水雜支虛糜不可勝計迭經諭令裁併乃竟置若罔聞或任聽委員劣器舞文一奏塞奏殊堪痛恨著各督撫懷遵前旨將現有各局所中冗員一併裁撤淨盡並將候補分發捐納勞績等項人員嚴加甄別裁汰限一月辦竣覆奏似此實力剔除庶幾庫款充裕得以宏拓新規惟不准瞻徇情面陽奉陰違致干咎戾當此國計艱難朝廷宵旰焦勞孜孜求治詔書敦勉以至誠爾在廷諸臣及封疆大吏等具有天良其尙仰體朕懷力矯疲玩積習一心一德共濟時艱庶幾無負委任若竟各挾私意非自便身圖卽見好便屬推諉因循空言搪塞必當予以重懲決不寬貸○諭國子監奏候補學正學錄黃職樞條陳時務請爲代奏一摺據稱民生日感宜厚生計蠶更橫征宜嚴考查等語朝廷整理庶務無日不以吏治民生爲念重農之外桑麻絲茶等項均爲民間大利所在全在官爲董勸庶幾各治其業成效可觀著各直省督撫督飭地方官各就物土所宜悉心勸辦以開利源親民之官莫如牧令近來仕途冗雜非嚴加考查不足以別貪廉錢糧之浮收胥吏之肆擾種種殃民之事該督上司果能悉心考核卽不肖官吏亦斷不至無所忌憚著各督撫懷遵六月十五日諭旨於所屬州縣認真查核毋令賢否混淆仍隨時秉公舉劾以示懲戒吏治清則民生自裕此卽封疆大吏之責無負朕之再三申誡焉○丙寅 上詣 奉先殿 壽皇殿行禮○修曲阜 文廟成○調張人駿爲山東布政使以岑春

煊爲廣東布政使○張汝梅奏應領昭信股票本息銀兩請捐助東省學堂經費得旨覽奏均悉所請捐助學堂經費著准行並交部核給獎敘○諭張汝梅奏查明黃河工段漫溢詳細情形請將在事各員分別參處一摺本年六月間山東上中兩游伏汛漫溢前經諭令該撫查明具奏茲據奏明詳細情形此次失事處所雖據報盛漲異常人力難施該管員弁究屬疏於防範承防分防之營官委員補用游擊劉芳池候補知縣彭錫瑞候補知縣左廷齡試用典史林介芹補用都司劉廷魁候補知縣吳金鉅候補縣丞戴奎光補用游擊葉雲升候補通判張芝祥候補縣丞嚴作楫均著革職膠州協副將夏錫純著一併革職留工勒令迅籌堵合以觀後效上游總辦交沂曹濟道沈守廉中游總辦補用道丁遠意上游提調曹州府知府邵承熙中游提調候補知府吳煜著一併交部議處仍責令督率營委趕將漫溢處所設法堵合此外漫溢民捻著一併迅籌修築並將被淹田廬查明分別賑撫另片奏總兵崔廷桂請一併議處等語崔廷桂遠駐下游勢難兼顧惟既係總理亦難辭咎著一併議處該部知道○諭理藩院奏放漢郡王呈訴冤抑牽涉賄託言官並將原呈呈覽一摺據放漢郡王達木林達爾達克呈稱東翁牛特郡王贊巴勒諾爾布因事陷害並蒙古奸員賄託御史參奏冤抑莫仲各節所呈情形是否屬實著派副都統切查辦據實具奏○丁卯諭軍機大臣等所事府通政使光祿寺鴻臚寺太僕寺大理寺等衙門現已裁

撤所有各該衙門一切事宜當併歸內閣六部分辦著大學士六部尚書侍郎即行分別從速妥議限五日內具奏○諭懷塔布等奏司員呈遞條陳請旨辦理一摺據禮部主事王照條陳時務藉端挾制等語朝廷廣開言路本期明目達聰邇言必察前經降旨部院司員有條陳事件者著由各堂官代奏毋得拘牽忌諱稍有阻格至於是非得失朕心自有權衡無煩該堂官等齟齬過慮也若如該尚書等所奏輒以語多偏僻抑不上聞即係狃於積習致成癰蔽之一端豈於前奉諭旨毫無體會耶懷塔布等均著交部議處此後各衙門司員等條陳事件呈請堂官代遞即由各該堂官原封呈進毋得拆看王照原呈著留覽○吏部奏光緒二十四年六月十一日內閣奉 上諭李端棻奏請刪改則例等語各衙門咸有例案勒為成書辭若畫一不特易於遵行兼可杜吏胥任意准駁之弊法至善也乃越時既久各衙門例案太繁堂司各官不能盡記吏胥因緣為奸舞文弄法無所不至時或舍例引案尤多牽混附會無論或准或駁皆恃例案為藏身之固是非大加刪訂使之歸於簡易不可著各部院堂官督飭司員各將該衙門舊例細心細繹其有語涉兩歧易滋弊混或貌似詳細揆之情理實多窒礙者概行刪去另定簡明則例奏准施行尤不得藉口無例可援濫引成案致起弊端如有事屬創辦不能以成例相繩者准該衙門隨時據實聲明請旨辦理仍按衙門繁簡立定期限督飭司員迅速辦竣具奏將此通諭知之欽此復於本

月初八日奉 上諭前經諭令各衙門刪定則例並令各堂官督飭司員限期速辦現在已經匝月著各衙門將辦理情形先行具奏欽此欽遵鈔出到部仰見我 皇上振興庶務因時制宜力剔積弊之至意查戶部則例於同治十二年開館修改至光緒十二年始獲告成刊板通行迄今又逾十二年之久其間欽奉 諭旨及內外臣工條奏並 戶部的改酌添章程今昔異宜辦理各別者 臣等恐成案太多易滋弊混業經於上年春間開館辦理擬一章程近已漸次編輯成篇辦有頭緒現又奉 旨飭定簡明則例自應歸併辦理所有從前舊例其應刪者即詳加釐剔其現行事宜應行纂入者亦量爲修改務期簡明盡人易曉方足以昭畫一惟是 戶部則例之繁由於品級班次之繁多亦由於花樣名目之各別其補選缺輪保舉限制尤爲頭緒紛繁至處分別例其議敘議處有關交涉事宜者尤多從前例章所未備必詳細納繹折衷至當庶可垂之久遠便於遵行 臣等公同商酌已於司員內揀選添派郎中惠森郎中延譽爲提調官郎中恩浩員外郎鍾琦爲幫提調官郎中戴錫鈞員外郎丁寶銓爲總纂官郎中范廣衡郎中雷祖迪爲幫總纂官其纂修校對收掌各官再由 臣等分別酌派添派並隨時督飭各員迅速辦理其應需款項由 戶部另行籌辦一俟刪訂成書 臣等校閱妥洽再行敬繕 黃冊進呈恭候 欽定又戶部奏 臣部纂修則例向由提調總纂等官編輯 臣等公同覆覈繕具 黃冊進呈查上屆修例之時因案卷繁多

奏請於戶部堂官中簡派一員專司勘定底本奉 旨著潘祖蔭辦理等因欽此欽遵在案此次遵 旨將舊例大加刪定並擬將同治十二年以後已辦各案擇要續行編入事務極為殷繁擬請查照上屆成案於戶部堂官中簡派一員專司勘定底本以昭慎重敬將臣等銜名繕具清單恭呈 御覽伏候 欽定 上諭吏部戶部奏遵旨刪訂則例具奏辦理情形各一摺各衙門例案太繁業經諭令迅速刪訂吏部銓選處分二項頭緒紛紜戶部收支款項名目煩多一切章程難免歧異著各該堂官督飭司員悉心刪訂務極簡明將核定例章仿照吏表分門別類釐為一表俾閱者一目了然吏胥無從舞文弄法至此項底本即著該堂官公同核辦戶部所請專派大臣一員勘定之處應毋庸議○以稽廢為廣州將軍色楞額為熱河都統調壽長為正黃旗滿洲副都統○諭軍機大臣等長萃倉匪把持私放黑檔請飭拿辦一摺據鳳聞富新倉於六月間放甲米時有私放黑檔三千餘石之事訪係該倉身後辦事人林四郎林鶴年主謀管帳人李大胡得成同辦理私帳均在李大胡得成家收藏又聞珠寶市謙和瑞爐房係該匪林四與內務府崔文照夥開又老君堂鴉鴿市均有該匪夥開當銷請分別查抄等語倉匪把持倉務舞弊營私實屬有干法紀著步軍統領即將林四等嚴密查拿按名弋獲並將私帳搜獲送部按例審辦林四郎林鶴年家產先行查封備抵以上倉儲原摺著鈔給閱看將此諭令知之○諭軍機大臣等

光祿寺卿常明奏敬辭的款以濟時用一摺據湖北候補知府鄭思賢稟稱廣東向有闕姓寶字館基
票三項行之已久勢難禁止除闕姓現規已提歸大學堂抽收經費其寶字館基票仿照招商承充舊案
辦理年可籌報効銀一百萬圓按季解交神機營作為練兵購械之用據情代奏請旨賞收並請以鄭思
賢招商承充等語著譚鍾麟確切查明欸項是否屬實並鄭思賢可否承充之處據實具奏又待請學士
濟澂奏保康公司商人何元善在總署稟請試辦廣東番攤每年報効銀六十萬圓作為大小學堂及專
練火攻等費請飭給咨試辦等語著譚鍾麟一併確查具奏原摺片均著鈔給閱看將此諭令知之○許
景澄奏查中俄會訂條約第八款准東省鐵路公司由某站起至大連灣或酌量至遼東半島營口鴨綠
江中間沿海較便地方築一枝路所有光緒二十二年中國與華俄銀行所立合同內各例宜於以上所
續枝路確切照行其造路方向及經過處所應由臣景澄與該公司議商一切等因先經臣等與俄外部
大臣商明枝路末處在旅順大連灣海口不在該半島沿海別處列入專條嗣經俄戶部大臣請照前案
與公司續訂合同以為承辦之據臣等旋與經理公司之戶部副大臣羅瑪諾夫總局董事齊格勒迭次
商論該公司以造路首重運料擬照原合同第四條所准水陸轉運之事訂定暫築通海口枝路暨行船
辦法並照上年已准成案自行開採煤礦木植等事臣等則以原合同第十款載明中國在鐵路交界設

關照通商稅則減三分之一此係指陸路而言今大連灣海口開作商埠貨物來往內地若援減徵稅恐牛莊津海兩關必至掣礙至內地與租地交界視中俄兩國交界有別設關處所亦須變通因擬改訂專款冀於利權主權稍有裨益彼此籌議再四始有成說該公司尙欲并開各項礦產等駁以在鐵路外另索利益力拒其請并於所議轉運開採各事酌議限制當將各款電達總理各國事務衙門商核旋准裂電令商加全路工竣年限俾營築之枝路屆期照拆亦與該公司商妥計合同凡七款首敘按照中俄會訂條約暨續訂專條推廣東省鐵路公司建造經理一枝路由幹路擇站至旅順大連灣海口悉照中國與華俄銀行所訂合同章程並續議各節如下第一款此枝路取名東省鐵路南滿洲枝路第二款造路需用料件准公司用輪船及別船并公司旗駛行遼河并該枝河及營口并陸地各海口運卸料件三款公司爲運載料件糧草便捷起見准其由南路暫築枝路至營口及陸地內海口惟造路工竣全路通行貿易後應將諸枝路拆去總之自勘定路線撥給地段日起一過八年必定拆去四款准公司在官樹林自行採伐每株由總監工與地方官酌定繳價惟盛京省內御用產物暨關繫風教歸北京政府管屬者不得損斲並准公司在此枝路經過一帶地方開挖煤礦亦由總監工與地方官酌定計斤納稅五款俄國可在租地內自酌稅則中國可在交界徵收貨物經鐵路從租地運入內地或由內地運往租地之

稅照海關進口稅則無增減並可商允俄國國家自開埠日起設關在大連灣委派該公司代爲徵收另派文官爲駐紮該處稅關委員六欸准公司自備行海商船照各國通商行船章程如經理虧折與中國無涉毋照原合同十二條價賈及歸還期限辦理七欸造路方向及經過地方應俟總監工在滿洲地方勘定情形由公司或北京代辦人與鐵路總辦公司商定以上各欸議定後復因鐵路經過奉天應行繞避 陵寢處所經與俄戶部外部再四磋商允定繞距三十里五月初九日承准總理衙門電開初一日電悉既據訂明繞避三十里於 陵寢風脈無礙即可定議畫押遵 旨電達等因臣等因卽於本月十八日會同與公司董事齊格勒等各將法文合同畫押訖至合同第五欸內載中國稅關商設大連灣一節經臣等預與俄戶部訂定業於畫押之日接准外部照會允照合同所訂辦理毋另案商議以歸簡捷下所司知之○戊辰 上詣 奉先殿 壽皇殿行禮○以裕祥爲成都將軍○以奕功爲鑾儀衛鑾儀使奉鐸爲金州副都統調銓楞額爲鑲黃旗護軍統領以永陞爲正紅旗護軍統領○諭昨據吏部戶部奏刪訂則例辦理情形當經諭令將核定例章仿照史表分門別類列爲一表使人明瞭因思刪訂則例各衙門均當照此辦理以歸劃一著該堂官等督飭司員悉心編輯毋稍紛歧○己巳以 慈禧端佑康頤昭豫莊誠壽恭欽獻崇熙皇太后駕幸頤和園 上詣瀛秀園門恭送○諭步軍統領衙門奏遵

旨查封倉匪房產並緝獲倉匪情形一摺所有現獲之李大等十四名口著交刑部嚴行審訊餘依議該衙門知道○庚午徐桐等奏內閣鈔出光緒二十四年七月十六日欽奉 上諭懷塔布等奏司員呈遞條陳請旨辦理一摺據禮部主事王照條陳事務藉端挾制等語朝廷廣開言路本期明目達聰適言必察前經降旨部院司員有條陳事件者著由各堂官代遞毋得拘牽忌諱稍有阻格誠以是非得失朕心自有權衡無煩該堂官等鯁鯁過慮也若如該尚書等所奏輒以語多偏激抑不上聞卽係狃於積習致成癩蔽之一端豈於前奉諭旨毫無體會耶懷塔布等均著交部議處此後各衙門司員等條陳事件呈請堂官代遞卽由各該堂官將原呈進毋庸拆看王照原呈著留覽欽此欽遵到部除此後各衙門司員等條陳事件呈請堂官代遞卽由各該堂官將原封呈進毋庸拆看之處恭錄 諭旨知照在京各衙門欽遵辦理外查律載應奏而不奏者杖八十係私罪降三級調用等語此案禮部尙書懷塔布等於司員呈請代遞條陳狃於積習欽奉 諭旨均交部議處應請將禮部尙書懷塔布許應駁左侍郎堃岫署左侍郎臣部右侍郎徐曾澧右侍郎宗室溥頤署右侍郎都察院左副都御史曾廣漢均照事應奏而不奏者私罪降三級調用例議以降三級調用係私罪無庸查加級議抵 上諭吏部奏遵議禮部尙書懷塔布等處分一摺朕近來屢次降旨戒諭羣臣令其破除積習共矢公忠並以部院司員及士民有上

書事者均不得稍有阻格原期明目達聰不妨紛毫兼採並藉此可觀中國人之才識各部院大臣均宜共體朕心遵照辦理乃不料禮部尙書懷塔布等竟敢首先抗違藉口於獻可替否將該部主事王照條陳一再駁斥經該主事面斥其顯違諭旨始不得已勉強代奏似此故意抑格豈以朕之諭旨爲不足遵耶若不予以嚴懲無以儆戒將來禮部尙書懷塔布許應駁左侍郎望岫署左侍郎徐曾澧右侍郎溥頤署右侍郎曾廣漢均著卽行革職至該主事王照不畏強禦勇猛可靠著賞給三品頂戴以四品京堂候補用昭激勵特諭○辛未以英年爲正紅旗漢軍副都統○諭京師爲首善之區現在道路泥濘溝渠河道壅塞不通亟宜大加修理以壯觀瞻著工部會同管理河道大臣步軍統領衙門五城御史會同勘將京城內外河道溝渠一律挑挖深通並將各街巷道路修墊坦平無得遷就敷衍仍將籌辦情形及開工日期從速具奏其款項著由戶部籌撥○諭張蔭桓奏請增修內政以戢民志一摺國家振興庶務尤以通達民隱爲先各省州縣於聽訟一事久不講求往往於戶婚田土錢財細故任意積壓累月經年將役門丁因之藉端訛索愚民受累無窮亟應實力整頓以除積弊而恤民隱前大學士直隸總督曾國藩所撰清訟事宜及清訟功過章程於清釐積案之法鉅細靡遺曾經頒發各省著各將軍督撫府尹重爲刊印頒發各屬並著照該侍郎所請於原定功過章程外增補道府功過章程所屬州縣局員有記

大過三起以上者道府記過一次六起以上者記大過一次記功亦如之其有容隱在先續行舉報或被參隱匿提報清結除將州縣局員分別輕重參撤記過外道府亦卽比例記功凡實缺計典候補委署及年終密考俱以清訟之功過分別予奪優劣該將軍督撫府尹等務當認真考核實力奉行以期政平訟理不得虛應故事視同具文並將遵辦情形迅速具奏○諭裕德奏敬保將才以備任使一摺除已革總兵黃金福已由張蔭桓保奏有旨送部引見外記名提督張士元著交兵部帶領引見○諭翰林院侍讀學士徐致靖奏允官既裁請酌量散卿以廣登進一摺著孫家鼐妥速議奏○諭張蔭桓奏請飭實行團練一摺據稱近來臣工屢有仿西法練民兵之請若各省實行團練卽以民團爲民兵徐定吏番替換之法較之選練民兵較有把握等語辦理團練既稱輔兵力之不足亦卽爲舉辦民兵根本實爲目前切要之圖廣西會匪滋事亟應迅速辦理以收捍禦之功著各省督撫按照張蔭桓所奏一律切實籌辦各直省限三月內廣東廣西限一月內各將籌辦情形先行具奏以副朕保衛閭閻至意○諭巡視中城給事中劉秀等奏遵保獲盜出力之司坊紳董照章請獎開單呈覽一摺著吏部議奏軍併發○諭內閣候補侍讀楊銳刑部候補主事劉光第內閣候補中書林旭江蘇候補知府譚嗣同均著賞加四品卿銜在軍機章京上行走參預新政事宜○諭張蔭桓奏臚舉將材請旨擢用一摺補用總兵鄭潤材署通永鎮總

兵李大器署邊州協副將龍殿揚已革廣東南韶連鎮總兵黃金福均著交部帶領引見另片奏保已革山東濟東泰武臨道張上達山東候補道黃瓊降補通判臨清直隸州知州陶錫祺均著開復原官原銜發往山東河工交張汝梅差遣委用俟此次河工事竣由該撫給咨送部引見○諭祥麟奏軍臺廢員由配脫逃請旨飭緝究辦一摺已革鑲白旗騎校順昌已革東城兵馬司吏目楊昌壽膽敢由配所脫逃該都統已咨行鄰境緝拿難保不潛行來京私回原籍著步軍統領衙門順天府五城御史盛京將軍浙江巡撫一體嚴拿務獲究辦○癸酉榮祿奏直隸順德內邱臨城等縣產有煤礦經前督臣李鴻章飭派候選郎中鈕秉臣籌集商款妥定章程設局試辦茲據該員稟稱遵飭招商集股購置機器開挖井硯十二處計在內邱者四處曰上坪曰磁窑溝曰南陽寨曰永固在臨城者八處曰岡頭曰石岡曰膠泥溝曰楊家溝曰新莊曰竹蠟曰牟村與高贊交界之處曰焦村其煤以上坪永固岡頭石岡為最佳牟村南陽寨焦村竹蠟磁窑溝次之膠泥溝楊家溝新莊又次之辦法以機器汲水開硯挖煤悉用人工俾附近窮民藉謀生計惟因銷路未能暢旺未敢擴充幸各礦均瀕臨大道為蘆漢鐵路必經之地將來鐵路告成既可資其煤以為用而該處附近銀鐵各礦亦可逐漸添辦請將試辦情形先行奏明立案等情前來奴才查近年迭奉諭旨開採五金各礦今內邱臨城等處煤礦該員經營數載已有端倪蘆漢鐵路告成

後銷路既廣當可漸收成效自應飭令認真經理以開利源下所司知之○張之洞等奏湖北荊州沙市鎮五方雜處民情浮囂前三年武漢客民聚眾械鬪戕殺多命本年復有焚燬關局延燒洋房之案皆以細故釀成巨案該地方正印各官均在荊州城內遠隔十餘里事出倉猝馳往防護已屬不及自上年沙市開關通商後交涉事件尤形繁難地方尤為緊要今昔情形迥然不同自應有關道及地方正印官坐鎮其間庶可隨時隨事就近經理消患未萌且查各省關道無不卽駐該關者應請將沙市口監督荆宜施道並江陵縣知縣衙門移駐沙市地方以資鎮懾而專責成至荊州城有將軍暨知府理事同知以次各官足資撫馭該道及該縣仍可不時回至府城稽察料理似此極度緩急是為移駐實於地方有裨得旨該衙門議奏○仰臬司管理圓明園八旗包衣三旗官兵並烏鎮營事務○諭色楞額現簡放熱河都統所管營練八旗騎營操演事宜著派載卓管理載卓所管之兩翼前鋒護軍營營練操演事宜著派派載瀾管理均著隨時督查勸訓考驗以期緩急可恃無負委任○諭總理各國事務衙門奏章京劉慶汾請仿照成法印造銅錢通飭各省籌辦摺呈代奏一摺著總理各國事務衙門妥定章程奏明辦理○諭張汝梅奏密保道府賢員請破格擢用一摺山東督糧道桂春武定府知府尙其亨著該撫飭令該二員來京預備召見○諭訥欽奏任滿籲請陛見又奏假滿病仍未痊懇請開缺各一摺該大臣既請陛

見又請開缺兩摺同日並發殊屬有意取巧希圖規避請欽著卽飭令休致○癸酉以裕祿李端棻爲禮部尚書開普通武爲禮部左侍郎薩廉爲禮部右侍郎○以李培元爲吏部右侍郎劉恩溥爲倉場侍郎曾廣鑾爲都察院左副都御史○以廣忠爲正黃旗漢軍都統○派裕祿在總理各國事務衙門行走○諭親民之官莫如牧令自來循吏著績皆以養民教民爲先務近來地方州縣既有保護教民之事又有培植學堂之舉內政外交責成尤關緊要非得明體達用之能員措置安能裕如茲各直省督撫留心訪查所屬地方州縣官如有通達時務勤政愛民者著卽隨時保送引見以備錄用朕爲國爲民殷殷求治該督撫等務當屏去私心汲引善類方不負大臣以人事君之義○諭前據戶部奏辦理昭信股票原定章程應借與否聽民自便不准苛派抑勒嗣因地方官辦理不善經御史黃桂崧等公同奏參四川山東等省辦理昭信股票苛派擾民當諭令該部妥議具奏茲據戶部奏稱股票擾民屢經指摘近時收數無多除京外各官仍准隨時請領並官民業經認定之欸照數呈繳外其紳商士民人等請一概停止勸辦等語朝廷軫念民艱原期因時制宜與民休息豈容不肖官吏任意苛派擾害閭閻其民間現辦昭信股票著卽停止以示體恤而順民情餘均照部議行該部知道○諭李鴻章敬信均著毋庸在總理各國事務衙門行走○劉樹堂奏准總理衙門咨本衙門會同戶部議覆河南巡撫奏擴充製造廠局添購機器

一摺本日奉 硃批依議欽此鈔錄原奏咨照前來當即欽遵轉行遵照辦理伏查 臣前奏擴充製造廠局係欽遵光緒二十三年十二月二十五日 上諭籌議辦法請 旨交議尚未實見諸施行者也所陳鍊鋼以迄造快鎗礮造無煙火藥各項機器皆榮祿原奏指令購辦者竊念規模較大需款浩繁斷非一省財力所及 臣是以有請合數省之力經營數省之議並非設有豫廠而各省之廠可廢也總署原奏既以爲毋庸置議 臣又何敢多瀆至以餉式機器祇足製造各彈而緩急仍不可恃儘可由 臣隨時參酌更易名目報部核銷毋庸作爲另案一節查本省現購機器誠如原奏所云係爲積存鎗枝製造子彈之用 臣於購辦機器懇請免稅案內詳細聲明若更易名目報部 實不敢出此在總署規模宏遠視豫省之機器廠局可有可無故令不必作爲另案而不知本省財力所限辦此區區已屬萬分竭蹶 臣亦知現辦局廠規制甚小緩急未必足恃惟創始之初難言周備若令照榮祿原奏辦理實有未逮祇有竭其力之所及恪遵 諭旨漸次擴充以仰副 聖主整飭武備之至意查豫省現設機器廠局在省城南門外阜屯地方與惠濟河相近水極清澈造彈機器業已安置停妥派委候補道李金展總理其事招募工匠於三月二十九日開工續購造藥及造礮鎗車牀亦將次運到並訂購鋼筋五百枝擬先造後膛礮鎗五百桿以資應用現在本省之新練豫止軍一律改習洋操 臣又責令各州縣自練勇隊保衛地方所需鎗械

子藥尤夥將來局廠之所造數用既省購運兼塞漏卮軍營操練之所用可以不另開銷各州縣之請領者仍可改令繳價雖暫費於目前可收效於後日目前請提用裁營節餉餘款部駁不准動用自應遵照籌還惟司庫款項歷年入不敷出久在 聖明洞鑒之中其報解各項餉需經費大都設法騰挪移緩就急若指撥大案款項為製造廠局之用實屬無從措畫即有新辦之款均經部撥有差無可挪移惟有請將此項用款准其作正開銷隨時籌款辦理至應解部庫及各省關款項仍照常起解不至有誤等情據布政使額勒精額具詳請奏前來 聖 維機器製造局廠係奉 特旨籌辦之件以儲庫需而振工藝實屬不容緩圖豫省財力有限鉅款未易措集亦係實情相應籲懇 天恩俯如所請准將機器用款作正開銷由 鴻施逾格得 旨該衙門知道○劉樹堂奏豫省前因銀賤錢貴兵民交累明知制錢缺少鼓鑄工本鉅額不敢輕議因設立豫泉官錢局參用錢票銀元冀制錢之不足經臣奏明在案開辦以來官局錢票尚無滯礙銀元固於習俗迄未暢行仍以現錢為重所恃為周轉者初令附近州縣解錢入省久則省外又有錢缺之患錢源尤涸銀價尤難增長欲圖補救之方惟有急籌鼓鑄臣與司道再三商榷悉心訪查有候補知縣韓國鈞心精力果辦事結實與之講求具有條理因豫省非產銅之區先行通飭各屬並派員分投收買廢銅數月以來集有成數並司庫存有碎銅當日大錢久成廢棄亦堪酌鑄即

委韓國鈞總理其事並派委候補同知黃鳳岐候補縣丞龐訓彝劉士燮幫同辦理爰就咸豐年間鑄造大錢之寶河局量加補葺修置爐座購備器具僱募工匠於光緒二十四年五月初十日開鑄試鑄錢錢仿照浙江等省鑄法非徒節省銅木兼可杜絕私銷鑄出之錢解交官錢局分發搭用現已開鑄十爐規模粗具惟工匠皆係生手尙難定准卯額及每卯鑄錢若干且須銅斤充裕方免停待廢銅恐有時而盡擬卽派員採買洋銅配用以期源源不竭所請銅本現已查照前鑄大錢奏明成案在於老牙沽條新雜稅項下動支作正開銷下部知之○甲戌諭現在裁撤各衙門業經分別歸併所有各衙門裁缺各官未便聽其閒散現當振興庶務詳審久遠應於鐵路礦務總局酌設大小官數缺以備將來量能任使著總理各國事務王大臣會同吏部妥速詳議具奏○欽裕銅副都統銜作為駐藏幫辦大臣○諭河東河道總督一缺前經降旨裁撤所有該管之山東運河著歸山東巡撫就近兼管以專責成○諭戶部奏代遞主事王鳳文請設工賑一摺以工代賑實救荒之良法中國辦理荒政苟有此條而泰西推行尤廣所有修造工程各項手藝皆足為養賑窮民之用國家偶遇災荒賑施動撥鉅款而在事人員辦理不善使源官領弊竇自出災黎轉不得均霑實惠若以工代賑則弊杜而工業可興近來江蘇湖北山東等省偏災屢告饑民轉徙流離朕心深為軫念王鳳文所請不無可採著農工商務總局端方等妥議開辦章程迅

速具奏○諭戶部奏代遞主事甯述能條陳一摺廣興機器為製造貨物之權與現在開辦農工商總局並飭各省開設分局振拓庶務應用各項機器甚多著各督撫裁節冗費籌備的款妥議迅設局所分別置造以擴利源而資民用○以松鶴為鑲紅旗蒙古副都統○諭孫家鼐奏請設醫學堂等語醫學一門關係至重亟應另設醫學堂考求中西醫理歸令大學堂兼轄以期醫學精進即著孫家鼐詳擬辦法具奏○命徐樹銘為國史館副總裁徐用儀為會典館副總裁○貴恆奏烏里雅蘇臺距京六千餘里外盟二十驛山路崎嶇內盟四十四臺沙漠曠遠向係遇有緊要摺件由驛馳遞即將尋常摺件附入並奏若派專弁齎遞傳付駝馬屢年於臺站情形頗擾擬請仍照舊章由驛行走毋 旨如所請行○以李經羲為福建布政使調蔡希邠為湖南按察使以張廷熾為廣西按察使○劉坤一奏接准戶部咨續借英德商款以七處贖金作抵各省京協各餉及本處防餉等項向取給於贖金者勢必驟形短絀現經奏准在江蘇江西安徽浙江福建湖南湖北四川廣東河南十省裁兵節餉丁漕折錢平餘及現辦昭信股票項下劃撥銀五百萬兩作為自稅司代徵後補足七處贖金抵還洋款之數經此次撥補後本年應解京協各餉務當依限報解明年應由何項撥補俟稅司代徵後比較收數再行酌度等因當即轉行去後茲據各該司詳稱查前因七處贖金改歸稅司代徵抵還洋款以致短少竊蘇防練軍餉籌防經費長江

兵餉認還瑞記及四國各洋欸共銀一百九十三萬兩現已電准截留浙西代徵絲繭捐及本省牙帖捐
絲繭捐共銀十二萬三千兩約仍短少銀一百八十餘萬兩事關計授要需及認還洋欸之用礙難稍有
短缺是以就甯蘇兩藩庫裁節兵餉支應局裁節勇餉及司關道局原認京協各餉內分別指欸截留開
單詳咨在案尙未奉部核復茲部議以十省裁兵節餉等欸撥補銀五百萬兩除撥補九江贛浙東貨
釐宜昌鹽釐加價共銀二百二十萬兩各項欸目應由江西浙江湖北等省查明辦理外其抵補蘇滬貨
釐鄂皖鹽釐共銀二百八十萬兩內係指提裁兵節餉等欸銀二百四十七萬兩並以先准截留撥補之
絲繭捐牙帖捐洋藥稅釐准鹽加價等項銀三十三萬兩共符前數本應遵照辦理惟是原單指提江蘇
裁兵節餉共銀四十八萬三千兩一款查江蘇裁節勇餉每年納銀五十萬兩除奏准開支添募江勝六
營餉項外僅能餘銀三十萬兩其裁節兵餉原係分作三起查道須俟本年十一月底一律裁竣再補第
三起所放八箇月恩餉銀米扣至二十五年八月起乃能符原奏裁節餉項之數現在節餉無幾截至年
底約餘銀五六萬兩是以前擬共請截留銀三十六萬兩未能如此次部撥數目之多又指提江蘇江甯
丁漕平餘銀十四萬兩一款查江甯藩庫支絀異常奉撥洋欸無可籌解不得已將甯屬丁漕平餘詳請
奏明湊還洋欸尙未准部覆而司庫出入不能相抵實難爲無米之炊蘇屬丁漕平餘須俟各屬陸續徵

解目下亦難濟急需又指提江蘇昭信股票銀一百十五萬七千兩一款查此項截至現在止甯局收銀十八萬餘兩蘇局收銀一萬餘兩兩淮運司收銀三萬餘兩其餘官借尚未繳齊商賈借款原案係儘年底繳清勢難過事催迫現尚未有收款至指提外省各款業經分別電請據廣東省覆稱奉撥裁兵節餉二十八萬兩此項奏明專還英法俄德洋債一款不能兩用無可撥解安徽省覆稱部撥各款銀十九萬兩惟昭信股票七萬兩稍遲未解其裁兵節餉詳明抵放恩餉丁漕平餘統年統計不過三萬九千餘兩恐微不足數尙有知照江西省覆稱裁兵節餉六萬兩尙未奉文俟到省查覆惟河南覆稱部撥裁兵節餉等款十六萬兩如數籌匯各等語竊維自贛贛金於閏三月間改歸稅司代徵後本省水陸各軍餉源頓竭此數月騰挪應付甚費支持若不迅籌接濟深虞延誤今奉部撥補多欸其中本省之項或業經撥作還欸或目前尙難截數以外之項亦屬充解寥寥均不能即時應用亦難恃此以爲的欸藉抵軍餉及認還洋債各要需司道等公同酌駁應請查照前次會案准以裁節兵勇各餉撥補銀三十六萬兩其餘一百四十五萬兩仍在京協各餉內按數截留俾得分別文應既免遞年分籌之累且可省此隔解之煩至現辦昭信股票俟後收有成數自當報部候撥其原定京協各餉仍請由部一併核明另行改撥江蘇省應免認還等情詳請奏前來中等覆查七處贖貨贖金改徵抵借江南賑短軍餉洋欸至一百八

九十萬兩之多不得已將應解京協各餉指款截留備抵開單咨商戶部核辦以本省之款供本省之用
理勢宜然最爲簡便若如部臣所奏必將以廣東等省款項解之江南江南復以此解之他省既爲受協
省分而又協解於人轉折太多遲誤難免此猶就款皆有著者言之也今指撥外省各款或業經提用或
緩不濟急該司局所詳均係實情計口授食之需按期認還之項絲毫不容短少斷非空言所能塞責
等受 恩深重仰體時艱但可勉力支持不致遷延貽誤亦何敢固執成見上瀆 宸聰無如忝列疆圉
責無旁貸東南爲國家財賦所繫軍餉爲地方命脈所關各項洋款更爲邦交大信之所在設或餉缺譁
潰款絀逾期等實不敢當此重咎況此次部撥各款以此次昭信股票爲大宗股票願領與否本屬聽
民自便以後收數雖不可知而體察情形斷不能如開辦伊始之旺與其暫時敷衍來年仍須另籌何如
就近截留從此一勞永逸在部臣通盤籌畫不欲一隅之地牽動京協各餉全局自係確守舊章而江南
情事既如此所撥款項又如彼時勢使然有不得不變通辦理者斟酌遠近而轉輸各得其宜分別改撥
而中外兩無所礙盈虛酌劑端在部臣一轉移間耳再四籌維惟有籲懇 天恩勅部仍照前等前次指
款留抵各案辦理以爲經常之計而免匱乏之虞出自 聖主鴻施下戶部議奏○乙亥以陝西候補道
黃嗣東江蘇補用道王澧勸辦湖北賑出力交吏部帶領引見○諭王照奏私罪被革之員體混列保請

行辦理一摺已革山東濟東泰武臨道張上達山東候補道黃瓊降補通判陶錫祺前經李秉衡參奏均屬劣跡昭著張懷和朦混列保等語張上達黃瓊陶錫祺前在山東才品究竟如何是否可用俟到工後著張汝楠查明具奏○諭孫家鼐奏選議翰林院侍讀學士徐致靖請酌置散卿一摺古有侍從之臣皆遴選才能以議庶政現當朝廷振興百度自應博採衆論益集思以期有裨政治著照所議酌置三四五品卿三四五六品學士各職遇有對品之卿缺並翰林院衙門對品缺出卽由吏部一體開單請旨錄用以供履納仍著按品給予俸祿應如何詳立條議著爲定例著該部妥議具奏○諭廷茂奏遵查將軍長順代奏前辦夾兒被參各員呈請究抑情形據實覆陳各摺片據稱該省查辦夾兒一案委員張呈泰等前定增租辦法至今沿用其議並非必不可行該委員等有擬改蒙民原議勒贖佃民文契情事至鄉民聚衆抗拒以致匪徒乘隙勾結文允職司地方兼總辦局務曾同張呈泰等具稟請兵部彈壓自係分所當爲文允曾同明順丁存恭等帶隊前往諭解不從始有縱擊生擒首從分別保釋自不得謂尙欠謹慎前將軍恩澤查參處分均未失之過重請飭部更正等語著該部詳核案情議奏請旨另片奏已革州同秋桐像等三員被參各節查無實在劣跡等語著該部一併議奏○諭軍機大臣等近日各衙門呈遞封奏有一日多至數十件者嗣後凡有呈請代遞之件著於到後卽分日進呈不必拘定值日之期○內

子 上詣 壽皇殿行禮○諭前經降旨裁撤府等衙門並諭令大學士六部及各直省督撫將其
餘京外應裁文武各缺及一切裁減歸併各事宜分別詳議籌辦迅速具奏現在已裁各衙門歸併事宜
業由各該衙門遵照辦理其餘各衙門應裁文武各缺尚未據將籌辦情形具奏應再申諭該大學士六
部尚書侍郎及各省督撫等懷遵前旨將在京各衙門開冗員缺何者應裁何者應併速即切實籌議外
省道員以及通同佐民等官及候補分發捐納等項人員認真裁併並嚴行甄別沙汰其各局所冗員一
律裁撤淨盡本日據戶部代遞主事吳錫堯條陳內稱漕督所轄衛所各官既係武職並無管帶漕糧之
兵名實殊不相符所有軍田可以撥歸各州縣徵收等語此項人員本在應行裁併之列即著該督撫等
妥速議辦並漕督一缺究竟是否應裁亦著兩江總督江蘇巡撫一併詳議具奏至京外已裁實缺候補
各員應如何分別錄用及飭令回籍候缺均著妥議條欵請旨辦理該大學士尚書侍郎督撫等務當從
速籌辦不准稍事遷延尤須破除積習毋得瞻徇情面用副朝廷綜核名實之至意將此通諭知之○諭
總理各國事務衙門代奏道員汪嘉棠條陳內稱水旱偏災地方官宜軫念民困等語國家勸恤民隱每
遇各省奏報偏災無不立沛恩施分別蠲緩乃任事各員不免假手吏胥因緣為利民間不獲盡沾實惠
甚至蠲緩贍黃連之又久始行張貼以致經徵入官之數無可稽查種種弊端實堪痛恨以後該辦理賑

務印委各員如有侵吞浮冒情事卽行嚴定罪名外其各督撫常年具奏調緩分數並奉到諭旨卽行刊刻騰黃徧行曉諭不得藉口於部文未到稍有延擱致滋弊竇將此通諭知之○諭胡燏棻奏請造京西運煤鐵路一摺西山一帶所產煙煤專備京城炊爨之用向用駝運費重價昂該府尹現擬將蘆溝橋鐵路展造至門頭溝路既非遙需款亦不過鉅卽著該府尹督飭洋工程司趕緊勘估計籌款興辦餘著照所請辦理○諭總理各國事務衙門奏遵議四川礦務並該省京官等呈請派員前往會辦一摺四川礦務商務經前派往之翰林院檢討宋育仁開辦業已稍有頭緒惟該省產礦處所甚多商務亦極繁盛非大加興辦不足以拓利源著卽派雲南補用道韓鈺記名道李徵庸會同翰林院檢討宋育仁妥籌辦理並於該紳商自設商務局外併設礦務局所有集款開辦一切章程卽著韓鈺等報明總理各國事務衙門暨鐵路礦務總局核定切實妥辦以專責成○丁丑以候選道李徵庸捐輸准徐海賑交軍機處存記過缺簡放○以靈璧縣教諭胡青雲赴京會試不遵例請咨擅將鈐記交訓導夏宗慶護理夏宗慶徇情擅接知縣鄭葆清任其離任均交部議處○諭依克唐阿等奏查明 昭陵應修各工情形較重請擇吉興修著欽天監於本年八月內選擇吉期行知依克唐阿等遵照敬謹興修以昭慎重餘著照所議辦理該衙門知道○諭向來督撫藩臬任滿三年應行奏請陛見近來往往因有緊要事件至期不卽奏請

嗣後各該督撫藩臬仍著扣定年限奏請陛見聽候諭旨○諭刑部奏代遞主事蕭文昭條陳一摺國家出口貨以絲茶爲大宗自通商以來洋貨進口日多漏卮鉅萬恃此二項尙堪抵制乃近年出口之數銳減若非亟爲整頓恐愈趨愈下益無以保此利權蕭文昭所請設立茶務學堂及蠶桑公院不爲無見著已開通商口岸及出產絲茶省分各督撫迅速籌議開辦以阜民生而固利源○戊寅以錫光爲青州副都統○諭都察院代奏四川舉人陳天錫等敬陳管見一摺所請將大挑教習磨錄各項人員於會試薦卷中挑取及科甲候補人員准其一體考差等語著吏部禮部會同妥議具奏○諭總理各國事務衙門會同兵部奏遵議武場改制事宜一摺朕詳加披覽所擬章程尙有未能賅備之處著軍機大臣會同總理各國事務衙門兵部再行分晰條款詳議具奏○諭中書部承臚奏請將各省教職改爲中小學堂教習一摺著孫家鼐妥議具奏○諭刑部奏代遞主事顧厚焜呈請京城郵政廣設分局都察院奏代遞優貢沈兆偉呈請推廣郵政裁撤驛站各等語京師及各通商口岸設立郵政局商民既皆稱便亟應多設分局以廣流通至各省府州縣若能一律舉辦投遞文報必無稽遲時日之弊其尙設驛站之處自應酌量裁撤著總理各國事務衙門會同兵部妥議具奏○諭瑞澂奏備設報館實力勸辦一摺報館之設原期開風氣以擴見聞該學士所稱現在商約同志於京城創設報館編譯新報爲上海官報之續等語卽

著瑞洵創辦以爲之倡此外官紳士民並著順天府府尹五城御史切實勸辦以期一律舉行○諭瑞洵奏請考試司員等語司員賢否爲任職授事所關曾經諭令各部院堂官考試著卽懷遵諭旨認真試以策論秉公分別去取筆帖式亦著一律考試又編修趙炳麟奏整頓部務擬令司員逐日到署辦事擬稿稽覈司員優劣等語所言尙屬核實著各部院堂官卽行認真整頓○諭翟鴻燾奏江陰南菁書院遊改學堂並將沙田試辦農學一摺江陰南菁書院經前學政黃體芳創設考課通省舉貢生監現既改爲學堂著准其照省會學堂之例作爲高等學堂以資鼓彈該書院原有自營沙田一項據情擬參用西法樹藝五穀菓蔬棉麻等項將未經墾熟之地先行試辦如有實效再行推廣等語學堂農會相輔而行洵爲一舉兩得之道該學政此奏具見籌畫精詳留心時務卽著照所議認真辦理務收實效毋託空言○諭國家振興庶政兼採西法牧民之政中西所同而西人考究較勤故可補我所未及今士大夫固於成見者謂彼中全無條藝不知西國政令教學千端萬緒主於爲民開其智慧裕其身家其精乃能美人性質延人壽命凡生人應得之利益務令推廣無遺朕夙夜孜孜改圖新法豈爲崇尚新奇乃容懷赤子皆上天之所畀祖宗之所遺非恣令其康樂和親朕躬未爲盡職加以各國交迫尤非取人之所長不能全我之所有朕用心之苦而衆庶猶有未知咎在不肖官吏與守舊之士夫不能廣宣朕意乃至胥勸

浮言使小民搖惑驚恐山陬海澨之民有不獲聞新政者朕實爲歎恨今將改行新法之意布告天下使百姓咸喻朕意共知其法之可恃上下同心以成新政以強中國朕不勝厚望著查照四月二十三日以後所有關乎新政之諭旨各省督撫均迅速照錄刊刻謄黃切實開導著各省州縣教官詳切宣講務令家喻戶曉各省藩臬道府飭令上書言事毋得囁默顧忌其州縣官應由督撫代遞卽由督撫將原封呈遞不得稍有阻格總期民隱盡得上達督撫無從營私作弊爲要此次諭旨並著懸掛各省督撫衙門大堂俾衆共觀庶無壅格○諭岑春煊奏徐海等處被災嚴飭州縣不准諱匿苛斂等語各省小民孰非朝廷赤子遇有災祲饑饉流離朕一人耳目難周全賴地方官撫綏賑濟以蘇民困若如所奏江南徐海等處上年被災各州縣並未據實詳報仍將漕米苛收如果屬實不知該牧民是何肺腑惟不肯官吏玩視民瘼恐不止江蘇一省著兩江總督確切查明如有諱匿苛斂情事卽行嚴參懲辦並著各省督撫嚴飭各州縣等如或徂於積習諱災不報亦當隨時嚴參以副朕病瘼在抱之至意○諭侍讀學士瑞澂奏南漕改折有益無損請飭妥議施行及每年著提折價於津通一律購米以實倉庾並將屯田裁併改由地方官徵租各摺片著派奕劻孫家鼐會同戶部妥議具奏○諭前因振興庶務首在革除弊端當經諭令各衙門代遞事件毋得拘牽忌諱嗣因禮部阻格司員王照條陳當將懷塔布等予以重懲復先後諭令

都察院及各衙門隨到隨遞不必拘定值日之期誠以百度維新必須明目達聰始可收敷奏以言之效第恐大小臣工狃於積習不能實力奉行用再明白宣諭以後各衙門有條陳事件於次日即當呈進承辦員司稍有抑格該部院堂官立即嚴參懲辦不得略予優容所有六月十五日七月十六日諭旨七月十九日硃諭七月十七日及二十四日諭旨均令各衙門鈔寫一道同此件諭旨一併懸掛大堂俾得寓目警心不至復萌故態以示朕力除積蔽之至意○諭日講起居注官黃思永奏籌款試辦速成學堂一摺京師大小學堂雖經先後降旨諭令孫家鼐及五城御史分別舉辦茲據奏稱小學堂收效尙易大學堂事屬創舉辦理不易欲速不能請自行籌款設立速成學堂以期收效等語用意殊屬可嘉著卽如所請籌款試辦以爲之倡果有成效再行擴充並當予以獎勵著俟查看情形隨時具奏○陳寶箴奏准兵部咨開會議具奏變通武科章程一摺並約舉大概章程十條於光緒二十四年二月二十六日欽奉上諭著照該大臣等所議各直省武鄉試自光緒二十六年庚子科爲始會試自光緒二十七年辛丑科爲始童試自下屆爲始一律改試鎗礮等因欽此又准兵部咨議擬廣西巡撫黃槐森奏武科改試洋鎗並考取中式後分別選用一摺請飭下各省將軍督撫學政等各就見聞所及詳細奏明並開列各項章程報部酌辦等因光緒二十四年三月二十八日奉旨依議欽此欽遵咨行到湘仰見我皇上經

武備材因時通變至意欽佩莫名臣維立法必須防弊取士先責儲才火器久懸例禁今日洋鎗尤極猛烈自不准人人自行購藏致滋流弊然不能購藏卽又無從學習以應考試是以部臣有令就武備學堂收領教習之誡惟各省省會學堂一時尙難盡設各府屬州縣皆設武備學堂如今日之書院計非數年所能就緒目前應試必致無人國家既不欲卽廢武科則防弊儲才實無兩得之策惟思近日各省防綠等營漸多改用洋鎗部議謂寓營制於科舉之中亦卽可寓科舉於營制之中伏查定例營衛千總把總准應武闈鄉試馬步兵丁准與武童一體考試武生情願入伍食糧者准其兼充是武科營伍本自相通擬議令綠營防營弁目兵勇各分應貢試鄉試既以廣其出身之路使之操練精勤不煩督責卽可於其中拔取殊尤以備任使似於取士練兵之道兩有裨益且免以鎗礮散布民間致令防範偶疏卽有無窮之患正在諮詢擬奏間適湖廣督臣張之洞以所奏摺稿咨送到臣恰與臣所擬兵勇應試之議不謀而合而所論其中利病至爲精詳多爲臣擬議所未能及第就原摺反覆籌思覺尙有一二宜更補陳以備聖明採擇飭部臣一併籌議者一曰定限制竊維兵勇得應武試且惟兵勇始得預試則人思自奮於功名而不甘於陞伏營壘每遇舉政按臨一府所屬州縣近者數十里遠者亦不過二三百里往返既易兵勇無不爭趨恐後將至一府所屬之地段營伍爲之一空抑之既與定章不符聽之又於地方不無

妨礙計不如照定限分別去留凡兵勇十人准以三人應試生童一律童試時令本管官擇其軀幹強壯年在三十歲以內者先行挑取如數造冊送交本府知府考試一場中送學政收考鄉試卽由本管各官會同地方官造冊徑送學政錄遺緣營勇營所送人數各就本營核計均不得逾十分之三既不妨其進取之階亦不致有空營赴試之慮矣一曰放餘兵兵勇應試既有限制則一郡之中無就近防營駐紮者應試之人自亦無多且向來已取武生暫無營額可補不免向隅坐嗟遲暮無故而限其上進之階使不得與新進武生爲伍似非人情所安計不如增放餘兵以示鼓舞查緣營本有餘丁以備出缺挑補茲擬令凡欲應試之武童生均先赴本籍或附近緣營及省會各標營充補餘兵卽就該營學習鎗礮並自行出資交營官稟請督撫給文購置鎗礮藥彈由該營隨時給發操畢隨繳歸本營收儲此項餘兵人數於年終造冊彙由鎮協轉送督撫學政立案過童試鄉試之年由營分別挑選擇其年力富強技藝精熟每十鎗能中靶至七鎗以上者核實造冊申送如營兵之例但既經考其技藝則不必拘定人數如送考後經學政督撫考試不符至三鎗以上者將冊送本管官分別記過示儆如投充餘兵時或有需索等弊查實參辦餘兵考取武生者營兵缺出先儘挑補考中武舉者發標操練分別候補武生武舉均聽勇營得充什長營哨等弁目武舉不歸標操練者不准會試既可使無遺才亦可藉整營伍積疲之習矣此外章

程張之洞所請以臣所見似尙詳盡可否仰懇 皇上將臣此奏與張之洞專摺一併 飭交部臣參酌妥議伏候 聖裁下兵部議奏○諭前據御史文悌奏參雲貴總督崧蕃並臬司興祿營私各節當經諭令王毓藻確查茲據派員查明覆奏據稱崧蕃潔清自重雲貴文武官均無異辭其被參賄賂需索各款均無實據臬司興祿識字無多辦理各局不能核實武弁亦多出其門下代求差委操守難信殊難勝任興祿著卽行革職另片奏總兵黃呈祥與督署門丁張升等相識私相來往等語專閫大員與督撫磨人交接殊失體統黃呈祥著一併革職至崧蕃與興祿同官日久該員既識字無多其辦事概可想見何以未經參奏該督門丁王姓張姓私收門包物議沸騰均有失察之咎崧蕃著交部議處餘著照所議辦理該部知道○己卯增祺邊寶泉綽哈布奏本年三月臣增祺 陛辭時復蒙 聖訓改用新法練兵因念旗練各營向無利器自須先行籌購鎗械方可資其練習查外洋鎗礮日出新奇如小口徑毛瑟滿力夏等鎗固皆輕快致速然用之稍不如法輒易損傷不特非初練者所宜其價值亦頗昂貴前向天津信義洋行定購單裝步毛瑟鎗四千桿雖於新式快鎗微有不如然陸戰則以藉佔地勢爲先臨敵發鎗自有各種用法果能續練純熟開撥靈便克敵致果亦有不盡恃擊速快放之間者計每鎗一桿帶刺刀一把連運腳共合天津花寶銀五兩二錢五分隨鎗子彈一百萬顆連運費共合行平花寶銀二萬四千兩其

們既不甚貴查驗俱係新鎗下邊寶泉查閩省後膛鎗庫內現存無多刻值整頓營伍講求操練之際各營多須領用擬勻撥二千桿子彈五十萬顆所需價值折合庫平銀二萬一千八百四十四兩六錢六分請在於閩海補解本省洋藥稅釐項下動支並增祺上綽哈布擬以二千桿子彈五十萬顆為改用新法練兵及邊 旨添設武備學堂入手操練之用所需價值折合庫平銀二萬一千八百四十四兩六錢六分合無仰懇 天恩俯准在於閩海關洋稅項下作正開支用款無多於海疆操防均有裨益再有應製配帶洋號等項約需銀二三千兩應請一併作正開支報部核銷至以後應添快鎗礮等件容俟籌有款項再為陸續奏明購置庶可次第習練精益求精以仰副我 皇上修明武備之至意得 旨如所請行○以鄒毓蘭為雲南按察使○以張紹模為貴州古州鎮總兵○諭都察院代奏舉人張如翰呈請設農學科等語著禮部會同孫家鼐端方等議奏○諭昨已明降諭旨令各省藩臬道府均得上書言事其州縣條陳事件均由督撫將原封代遞即著各省督撫傳知藩臬道府凡有條陳均著其自行專摺具奏毋庸代遞至州縣等官言事者即由督撫將原封呈遞至士民有欲上書言事者即由本省道府等隨時代奏均不准稍有抑格如敢抗違或別經發覺立將該省地方官嚴行懲處仍將遵辦情形迅速電奏○諭軍機大臣等有人奏竊臣等老悖謬阻抑新政釀亂四起請嚴懲褫革一摺據稱兩廣總督譚鍾麟年逾

七十兩目昏盲不能辨字跪拜皆須人扶持粵東環海千里武備尤重該督到任後首以裁水師學堂撤
魚雷學堂爲事裁撤輪舟二十八艘棄置不用近日疊降詔書舉行新政及停廢八股該督考試書院故
出入股題學堂至今未立其他商人稟請開礦築路等事則必逐之全省有談時務者不委差使吏士以
此相戒又最畏開盜廟吏莫不諱言禁出花紅盜益猖狂將軍督撫旁白其搶劫一縣劫案歲以千計
去歲高雷大亂調兵剿捕至今餘孽橫行出現間與匪合攻破崖州之六安州同城文武各官敗績逃
回未聞奏摺故有三月間高明縣城陷之事頃又聞信宜若聽該督戶居勢將全省蹂躪等語督撫屬
方重寄粵省地瀕海疆彈壓撫綏尤關緊要譚鍾麟久歷封圻受恩深重若如所奏種種昏謬情形實屬
大負委任著陳寶箴按照所指各款嚴訪密查如果屬實連卽參奏另片奏臬司魁元收受賂規知縣李
家焯縱勇爲盜知府王存善充當差差勒索工商各得規費番品知縣裴景福遇案受賄種種貪橫粵中
官方之壞皆此貪吏爲之而譚鍾麟倚爲心腹等語著陳寶箴一併逐款確察據實嚴參毋稍徇庇原摺
片均著鈔給閱看將此由五百里諭令知之○庚辰 上幸頤和園詣 慈福端佑康頤昭豫莊誠壽恭
欽獻崇熙皇太后前請安駐蹕○予錢應溥病假一月○諭軍機大臣等議覆袁昶條陳請籌八旗生計
等語旗丁生齒日繁徒以格於定例不得在外省經商貿易遂致生計日艱從前富俊松筠沈桂芬等均

會辦議及之現當自度維新自宜弛寬其禁俾得各習四民之業以資其生蓋戶部詳查嘉慶道光年間徙戶開屯計口授田成例切實訂立新章會同八旗都統迅速奏明辦理○諭軍機大臣等該覆袁祖條陳請清理屯田等語屯衛之設昉於明代本所以養民實邊至國初屯軍次第裁汰惟有清運衛分仍隸衛所乃專為貯運之計現在漕糧既歸海運衛所半屬虛懸若改衛為屯徵租充餉於國用不無裨益著兩江湖廣浙江各督撫通飭所屬澈底清查各衛所屯田地畝實在數目詳定徵租章程迅速奏明請旨辦理○辛巳呂徵病請解任允之○諭張英麟奏酌保人才以備任使一摺廣東候補道林贊嗣候選道林怡游分省備用知府劉恩駒均著來京預備召見刑部候補主事陸春毓該部傳知該員預備召見○諭嗣後各部院衙門奏事摺匣前後銅什件均要厚重堅固

光緒一百四十八

臣朱壽朋敬編

臣汪錫增恭校

八月壬午朔以成勳爲吉林副都統○諭軍機大臣等王錫蕃奏山東現辦河工請酌用西法挖泥船及打樁機器以資補救一摺所奏能否施行著張汝梅察看情形迅速具奏原摺鈔給閱看將此諭令知之○諭翰林院奏代遞黑古土丁惟魯請編歲入歲出表頒行天下一摺戶部職掌度支近年經用浩繁左支右絀現在力行新政尤須寬籌經費以備支用朕維育者家宰制國用量入爲出以審歲計之盈虛近來泰西各國皆有預算用度之法著戶部將每年出款入款分門別類列爲一表按月刊報俾天下咸曉然於國家出入之大計以期節用豐財蔚成庫阜朕實有厚望焉○諭戶部奏代遞王事蔡鍾藩請審官定職以成新政一摺朕詳加披閱除御史規復巡按舊制各關督改爲閫道兩節應無庸議外其餘所陳各條具有條理深得綜核名實之意可以見該施行著軍機大臣會同大學士各部院並翰林科道各官詳議具奏○諭現在練兵緊要亟隸按察使袁世凱辦事勤奮校練認真著開缺以侍郎候補袁成專辦練兵事務所有應辦事宜著隨時具奏當此時局艱難修明武備實爲第一要務袁世凱當勉益加勉切

實講求訓練俾成勁旅用副朝廷整飭戎行之至意○癸未以周遵爲直隸按察使○諭劉坤一奏選保使才一摺江蘇補用道錢德培特用道阮祖棠記名道羅嘉杰試用道陶森甲候補道沈敦和安徽候補道張佩緒著該督撫卽飭各該員來京預備召見○諭工部主事康有爲前命其督辦官報局此時聞尙未出京實堪詫異朕深念時艱思得通達時務之人與商治法康有爲素日講求是以召見一次令其督辦官報該以報館爲開民智之末職任不爲不重視該有爲欵著康有爲迅速前往上海毋得遷延觀望○諭劉坤一奏選保人材一摺江蘇試用道劉思訓江蘇候補知府柯逢時江西候補知府袁樹勛江蘇候補道丁葆元江蘇候補知州章邦直著該督撫卽飭各該員來京預備召見其另片奏保之河南候補道易順鼎卽著劉坤一傳知該員一併來京預備召見○諭閩曹通武奏徵舉通達時務人才一摺候選道陳日翔刑部主事陳桂芳兵部員外郎祁帥曾分發知縣馮寶琳均著預備召見○甲申 上還宮○諭陳兆文奏徵舉通達時務人員以供任使等語翰林院庶吉士李穆勳著預備召見○榮祿奏查光緒二十四年六月十二日奉 上諭近日各省裁汰營勇保衛地方全在嚴查保甲以輔兵力之不足各省辦理保甲章程非不詳備迭經諭令從嚴稽查率皆視爲具文並未將現在情形詳悉覆奏殊屬因循廢弛自此次申諭之後各該督撫務當嚴飭地方官於保甲一事實力奉行以期民情固結奸宄無從匿跡

仍將整頓辦法先行切實具奏以副朕綏靖閭閻至意欽此奴才查本年三月初四日奉 上諭嚴辦保甲聯絡漁團等因經前督臣王文韶札司移營遵照奴才到任後因查直隸地瘠民貧盜案疊出復經通飭各屬查辦保甲守望相助各保身家務須認真舉行勿得空言塞責分行司道飭遵在案欽奉前因復飭臬司申明保甲定章責成各州縣一體振刷精神從嚴稽查力挽因循積習聯莊之法亦可相輔而行總期民心團結奸宄無可匿跡屬境自臻平靖其沿海各州縣並應聯絡漁團以輔兵力之不足先將辦理情形詳細覆奏去後茲據署臬司覺羅廷雍詳稱保甲為百來比閭十伍之規立法非不美備無如日久懈生率多奉行故事今奉 聖諭諄諄自應嚴加整頓謹擬辦法四條一曰損益舊章查保甲章程以十家為一牌牌有牌長十牌為一甲甲有甲長十甲為一保保有保長每歲秋成農隙時牌長等查造戶口清冊達之於官填發門牌按戶實貼遇有戶口存亡遷徙均於冊內註明另換門牌此乃一定成規應令仍循其舊惟保甲為當務之急應趕緊查明戶口造冊換牌不必俟諸秋成其冊祇須按戶將男婦大小若干名向執何業逐一開寫此外田產錢糧等項細目不載以節簡便又舊章充當牌甲保長凡追比糧租勾攝詞訟以及雜項公務無役不從事既博而不專且有假公濟私藉端索擾者今宜專其責成前項一應公事概不令其與聞但司稽查戶口盤詰窩藏事以簡而易行志以專而有濟惟慮盜自外來捕

拿不易必須兼辦聯莊遇警鳴鑼各村協力兜擊聲勢聯絡首尾相應盜匪自無從遁跡至沿海漁戶恃其僻處地方官稽查難周平時或在洋面伺劫或與海盜通氣一有海警其患不可勝言應由沿海各州縣恪遵成法按船編號烙印給牌相度就地情形設法聯絡成團激勵其忠義之氣務使衆志成城有備無患二曰整刷積弊牌甲保長人等查造戶口清冊向有冊費冊成交更領發門牌又有牌費種種名目無非括百姓之脂膏供吏胥之賄賂今宜嚴禁一切規費所需牌冊紙張筆墨由各州縣捐廉給發民間不出分文該州縣尤當廣延公正紳董商同妥辦接收清冊填發門牌卽督同紳董經理勿假書役之手其有公呈舉首匪類窩家及兇惡棍徒須切實訊究盡法懲辦俾舉發良民不至受其報復間有辦無可辦釋難遽釋者稟請酌量監押數年以銷桀驁之氣三曰明定賞罰無賞不足以資鼓勵無罰不足以振怠荒嗣後牌保甲長人等如有許發巨盜巨窩地方官務須捐廉優賞銀兩臬司亦當酌量加賞方足鼓舞羣情一面酌量情罪輕重請發獎札功牌或自給花紅匾額如有力行保甲每屆二年所管戶內竊劫無聞者酌量給賞此係就多盜州縣而言如向無盜賊之處不在此例有誣良庇匪窩賄包娼定例各有專條分別照例擬辦毋稍寬貸至地方官辦理得宜當察其勞績大小分別記功調優獎倘奉行不力查其事之輕重分別記過撤任奏參以昭懲儆四曰嚴稽戶口按冊抽查一有不符悉心根究奸究卽在

其中牌保等如有違禁索費等情查訪得實立時提究法令自嚴州縣爲親民之官凡當撫字催科勘工查賑隨地隨時皆可稽察境內有盜有窩鄰村之人無不知者尤當互考旁求動之以利令各舉發立時親往查拿審得實情治本甲徇庇之罪實鄰村舉發之功如查獲窩家即將應行人官房產概給舉發之人夫許鄰村舉發則保甲不敢徇情盜匪從何遁跡其交界處所該地方官每月須與鄰封地方官會哨一次不必拘定日期隨時密商訂晤時互詢各本境保甲利弊一如互舉之法一面會同巡緝畛域無分蓋接壤之處每多匪蹤此拿彼竄必須會巡乃可得手其該管府廳直隸州應令勤加訪察隨時抽查如所屬保甲辦理不善或境內有盜有窩親往嚴密查辦該地方官自知失察於前自必奮勉於後司道亦隨時查考勸懲互施上下層層稽查而保甲之成效自著等情呈請核奏前來奴才查所擬辦法四條均屬簡易可行應飭各州縣實力舉辦不得陽奉陰違始勤終怠其有未盡關目或因地利宜應由各州縣量爲變通稟明辦理但期於事有益並不遁制其私現值時事多艱肅清內匪固結人心實爲目前切要之事惟有飭司督同各屬妥爲查辦用副 朝廷綏靖閭閻之至意得 旨知道了卽著嚴飭各屬切實辦理毋得徒託空言仍毘有名無實○乙酉 上詣瀛秀園門恭迎 慈禧端佑康頤昭豫莊誠壽恭欽獻崇熙皇太后還宮○奕劻等奏光緒二十四年七月二十六日准軍機處鈔交候補道汪嘉棠條陳

講求約章等語。奉機大臣面奉 諭旨著總理各國事務衙門通行遵照。同日又准鈔交面奉 諭旨通商約章成案彙編一書著總理衙門詳細閱看其中有應行改正者有應分類續行纂入者著妥爲編輯擬印數百部呈覽頒行內外各衙門令其廣爲刊布以便遵守並著嗣後遇有訂立條約及奏定章程並往來照會等件即行隨時分類增入擬印頒發毋得耽延遺漏欽此。查閱原條陳稱近來各省州縣教案疊出每因細故釀成巨案貽累 國家平日未解約章臨時故多舛誤查北洋刊有通商約章彙纂一書詳載約章成案條分件繫頗爲賅備惟書已閱多年中國與各國續訂約章及辦過成案尚未增輯擬請飭下北洋大臣選派經辦洋務人員一面查案修補一面先將原書趕飭刷印多部通行各省督撫將軍按照所屬州縣迅飭各領一部俟續刊告成補行頒發以便有地方之責者平時披閱遇事考核並嚴定章程責成該管道府隨時察核州縣如考究詳明辦理妥善者立予保薦不求甚解遇事顛倒者卽行罷黜儆罰既明才能自出事多外結免貽 宵旰之憂思患預防應早爲之計等語。臣等查辦理交涉事件自應講求約章遇事方有把握。臣衙門擬印約章近復增輯凡與各國交涉持以爲衡各省官吏知有條約者甚少祇山東書局翻刻一次其餘各省或以外交爲不急之務多不措意遇有交涉之案茫無把握輕重失當北洋所以有條約彙纂一書原期便於檢查而所敘成案間有中國自定未與各國商訂

者持與各使臣領事辯論每多軒輊現在奉 旨編輯臣等自應督率京詳加整正書成呈候 欽定
頒行以資遵守○衙門編輯未竣以前仍就北洋原書查對不爲無益擬請 飭下各將軍督撫先行派
員赴北洋請領嚴飭所屬道府州縣各領一部并入交代自領此書成後勤加考究凡遇交涉事件辦理
妥協者立予保薦否則即行罷黜以昭激勸庶幾辦事有藉消愚未萌○衙門編輯妥當即行補發 上
諭前經降旨諭令總理各國事務衙門編輯通商約章頒行各衙門以便遵守茲據該衙門奏稱編輯需
時請先將北洋原有條約彙纂一書刷印頒行等語即著照所請行仍著咨行各直省將軍督撫先行派
員赴北洋請領以便飭屬認真請求遇事得有依據仍俟該衙門編輯成書再行補發至此項通商約章
事務皆關交涉該衙門務須遴選熟習條約之員悉心考訂以成善本而免流弊餘依議○諭吏部奏遵
議處分一摺雲貴總督崧蕃應得降二級調用處分著加恩改爲革職留任滇黔地係巖疆督臣責任綦
重現當振興庶務該省開辦各礦以及整頓武備創設學堂并農工商務諸大端均係自強要策現在雲
南巡撫崧蕃經裁併該督責無旁貸務當振刷精神於用人行政一切事件破除積習俾有成效可觀方不
負朝廷曲予成全之至意○諭孫家鼐等奏順天擬設中學堂一摺京師爲首善之區允宜多設學堂以
繫四方觀聽所擬就順天府屬州縣中調取廩增附生入堂肄業考定額取四十名又另設外省士子南

額二十名課以西國語言文字及藝政算學各書所擬章程尙爲切實著照所議行惟經費必須寬爲籌備著於現解順屬漕折備荒經費項下撥銀八千五百兩作爲學堂之用以垂久遠另片奏請於地安門外兵將局撥給官房等語卽著內務府將該處官房給撥順天府設立首善中學堂用副作育人才之至意該部知道○諭孫家鼐奏四川京官四品卿銜內閣候補侍讀楊銳等呈請於京師設立蜀官學堂專教京員子弟及留京舉貢生監據呈代奏一摺川省地屬邊遠學堂規模誠未易遽臻美備現經該省京員就京師建立學堂以開風氣京員舉貢學業有成卽可爲鄉里師資所擬辦法亦甚切實楊銳等均著傳旨嘉獎所有捐銀二萬兩之二品頂戴記名道李徵庸關心時務慨輸巨款洵屬好義急公著賞給頭品頂戴直隸津海關道李岷琛捐銀二千兩雲南候補道韓銑兵部主事陳時利各捐銀一千兩著一併傳旨嘉獎餘著照所擬辦理該部知道○丙戌松蔭裕祥奏滇處極邊去京萬里奏事摺件若專派差弁齎遞恐程途遙遠有需時日請仍由驛馳遞得 旨如所請行○裕祥奏東川府會澤縣前被水成災田地仍難墾種擬再展限起徵得 旨如所請行○諭州縣爲親民之官必須才守兼優庶無愧父母斯民之任近來科擢往往意存遷就不復從嚴考核甚至著名要缺或以調劑私人不思精劣者濫膺仕途賢能者轉多屈抑殊非綜核名實之道該督撫等受國重寄必當以吏治民生爲重以後無論實缺署任均

須爲地擇人不可爲人擇地如有戒庸不肖之員隨時甄別務期仕途澄清官方共飭用副朝廷察吏安民之至意○丁亥以 慈禧端佑康頤昭豫莊誠壽恭欽獻崇熙皇太后駕幸頤和園 上詣瀛秀園門恭送○諭工部候補主事唐有爲結黨營私弄弄亂政屢經被人參奏著革職並其弟唐廣仁均著步軍統領衙門交刑部按律治罪○諭現在國事艱難庶務待理朕勤勞宵旰日綜萬幾兢業之餘時虞叢脞恭溯同治年間以來 慈禧端佑康頤昭豫莊誠壽恭欽獻崇熙皇太后兩次垂簾聽政辦理朝政宏濟時艱無不盡美盡善因念 宗社爲重再三籲懇 慈恩訓政仰蒙俯如所請此乃天下臣民之福由今日始在便殿辦事本月初八日朕率諸王大臣在勤政殿行禮一切應行禮儀著各該衙門敬謹豫備○諭御史宋伯魯濫保匪人平素聲名惡劣著卽行革職永不敘用○諭譚繼洵奏遵保使才一摺在籍翰林院檢討宋育仁湖北候補知府洪超著各該督飭知該員等來京預備召見○戊子祭社 稷壇上親詣行禮○以吳樹梅爲內閣學士○以崔廷桂爲山東曹州鎮總兵○諭都察院奏代遞已革參將金鳳岐條陳一摺金鳳岐前任江西吉安營參將所犯各案情罪重大經德馨查明奏參係奉旨革職勒令回籍交地方官嚴加管束之人茲復潛逃來京實屬膽玩著卽遞回原籍交該地方官嚴加管束不准在京逗遛該衙門知道○諭張汝梅奏節逾白露黃河水勢漸落請擬籌款堵築上中游漫口情形一

摺本年伏汛盛漲險工迭出上游籌張各縣先後漫溢當飭該撫將漫口處所設法堵築現在節迴白露
水勢漸落正可及時興工所請截撥各款銀四十萬兩著戶部迅即查照核撥奏明辦理該撫務飭在工
各員將所用椿繩樁料趕緊購備並就近招集災民以工代賑核實修堵剋期告竣至撥用各款尤當力
求節省不可稍有虛糜以副朝廷慎重河防之至意○諭禁城內外理宜嚴肅前經屢次諭令值班官役
認真巡緝近來仍有閒雜人等任意出入實屬玩弛不成事體所有紫禁城西苑頤和園三處著步軍統
領衙門遴派官弁率領番役各在宮門外分段巡邏不准稍有疏懈其該有護軍營管理地方仍著該統
領等嚴飭派出各員弁認真巡緝以重門禁倘仍前玩誤定當查取職名嚴行懲辦○己丑 慈禧端佑
康頤昭豫莊誠壽恭欽獻崇熙皇太后訓政 上詣朝政殿行禮○夕 月於西郊 上親詣行禮○諭
胡聘之奏遵旨保薦使才等語候選道許升著胡聘之飭令該員來京預備召見○庚寅諭張蔭桓徐致
靖楊深秀楊銳林旭譚嗣同劉光第均著先行革職交步軍統領衙門解刑部審訊○張汝梅奏山東
災情重大懇將本省賑捐暫照海防例籌辦一年下戶部議奏○諭刑部郎中英秀奏南漕改折無益有
損等語著派奕劻孫家鼐會同戶部歸入瑞澂摺內一併議奏○廣州將軍保年卒賜卹如例○辛卯
上詣 奉先殿 壽皇殿行禮○諭軍機大臣等翰林院代奏編修葉大澍請加意練閱並速籌生計以

固民心一摺著各直省將軍督撫各按地方情形將摺內所陳各節悉心體察如有可採之處卽行酌辦辦理原摺均著鈔給閱看將此各諭令知之○諭朕躬自四月以來屢有不適調治日久尙無大效京外如有精通醫理之人卽著內外臣工切實保薦候旨其現在外省者卽日馳送來京勿稍延緩○王辰奎俊奏保薦知兵之員前署長江水師提督彭楚漢記名提督借補江南城守營副將楊金龍請量予錄用得旨楊金龍著來京預備召見○榮祿奏令督練新建陸軍直隸臬司袁世凱自成軍以來卽規仿西制創設同文館隊步隊馬隊四項武備學堂於所部各營內挑選官兵作爲學生入堂肄習擬定條規兩年肄獎一次稟蒙督辦軍務處批准在案計自光緒二十二年四月初一日開辦起至本年三月底止已屆二年期滿該臬司輪調各生親加考驗所學兵法戰法算學測繪溝壘鎗學礮學操法及德國語言文字均能洞悉竅要日臻精熟該堂月領經費銀六百兩生徒共二百八十餘人所需薪水飯食及購置儀器圖書紙筆雜費等項每月約二千兩不敷甚鉅均由該臬司設法籌措各教習薪資甚薄亦各不辭勞苦認真課導著有成效而各員中以礮隊學堂監督段祺瑞尤爲出力現屆二年限滿適符定章請獎之期據該臬司袁世凱稟稱奏咨給獎等情前來奴才查泰西各國於練兵一事無不精益求精現值時事多艱力圖自強陸軍人材以武備學堂爲根本該學生所習各種西法事極繁難均能踴躍向學力求精

進此項官兵卽爲豫儲異日將材地步若不予以進身之階實不足以資鼓舞教習員司朝夕督課成就其廣亦屬著有微勞擬請援照天津武備學堂成案分別獎敘擇其尤爲出力各員及屢考優等學生酌保十六員散繕清單恭呈 御覽仰懇 天恩俯准照擬給獎以昭激勸奉 硃批著照所請該衙門知道單併發○崇禮等奏本月初六日步軍統領衙門奉 密旨工部候補主事康有爲結黨營私莠言亂政屢經被人參奏著革職並其弟康廣仁均著步軍統領衙門拿交刑部按律治罪欽此旋經該衙門恭錄 諭旨將康廣仁先行解部並聲明康有爲一犯俟緝獲到案再行奏 聞等正在派員辦理間初九日該衙門續奉 上諭張蔭桓徐致靖楊深秀楊銳林旭譚嗣同劉光第均著先行革職交步軍統領衙門拿解刑部審訊欽此經該衙門遵將官犯張蔭桓等七名悉數拿獲於初十一日一併解送到部等當飭提牢廳員將該官犯等分別收監查 臣部向辦重大案件均經奏派大學士軍機大臣會同審訊今此案該革員康有爲結黨營私莠言亂政牽涉大小臣工多名案情極爲重大相應援案奏請 欽派大學士軍機大臣會同 臣部審訊以昭慎重 上諭刑部奏案情重大請欽派大員會同審訊一摺所有官犯徐致靖楊深秀楊銳林旭譚嗣同劉光第並康有爲之弟康廣仁著派軍機大臣會同刑部都察院嚴行審訊其張蔭桓雖經有人參奏劣跡昭著惟尙非康有爲之黨著刑部暫行看管聽候諭旨至康有爲

結黨營私情罪重大業將附和該犯之徐致靖等交部刑訊此外官紳中被其誘惑之人朝廷政存寬大
概不深究株連以示明慎用刑至意○命吏部左侍郎徐用儀在總理各國事務衙門行走○諭朝廷振
興商務籌辦一切新政原爲當此時局冀爲國家圖富強爲吾民籌生計並非好爲變法棄舊如遺此朕
不得已之苦衷當爲天下臣民所共諒乃體察近日民情頗覺惶惑總緣有司奉行不善未能仰體朕意
以致無識之徒妄相揣測議論紛騰卽如裁并官缺一事本爲沙汰冗員而外間不察遂有以大吏制度
爲諸者舉此類推將以訛傳訛伊於胡底若不開誠宣示誠恐胥勦浮言民氣因之不靖殊失朕力圖自
強之本意所有現行新政中裁撤之詹事府等衙門原議將應辦之事分別歸并以省繁冗現在詳察情
形此減彼增轉多周折不若仍悉其舊著將詹事府通政使大理寺光祿寺太僕寺鴻臚寺等衙門照常
設立毋庸裁并其各省應行裁并局所冗員仍著各該督撫認真裁汰至開辦時務官報及准令士民上
書原以寓明目達聰之用惟現在朝廷廣開言路內外臣工條陳時政者言苟可采無不立見施行而疏
章跪進輒多撫拾浮詞雷同附和甚至語涉荒誕殊多庸雜嗣後凡有言責之員自當各抒謫論以達民
隱而官國是其餘不應奏事人員概不准擅遞封章以符定制時務官報無裨治體徒惑人心並著卽行
裁撤大學堂爲培植人材之地除京師及各省會業已次第興辦外其各府州縣議設之小學堂著該地

方官察酌情形聽民自便其各省祠廟不在祀典者苟非淫祀著一仍其舊毋庸改爲學堂致於民情不便此外業經議行及現在交議各事如通商惠工重農育材以及修武備濬利源實係有關國計民生者亟當切實次第舉行其無裨時政而有礙治體者均毋庸置議著大部及總理各國事務衙門詳加核議據實奏明分別辦理方今時勢艱難一切興革事宜總須斟酌盡善期於毫無流弊朕執兩用中不存成見爾大小臣工等務當體朕心共矢公忠實求是以副朝廷勵精圖治不厭求詳之至意將此通諭知之○諭延茂奏押解秋審獲犯中途脫逃請旨將疏防原解差官革職一摺秋審重犯派差押解宜如何加意嚴防乃竟漫不經心以致中途脫逃實屬異常疏忽差官雲騎尉全保著先行革職並著延茂提同解兵等研訊有無受賄故縱情弊仍飭勒限嚴緝逸犯袁果瞬務獲究辦該部知道○癸巳劉坤一奎俊奏挑濟劉河工竣出力各員擇尤請獎下部議奏○劉坤一奎俊奏捕獲馬匪首犯黑面施老窩子魁准將出力人員試用知府朱上洲等按異常勞績獎敘得旨如所請行○諭劉坤一等奏江蘇淮徐海等屬復被水災亟應預籌賑撫各摺片本年夏間徐海各屬霖雨爲災農田淹沒曾經諭令劉坤一等迅飭該地方官妥籌撫恤茲據奏稱災區較廣若不急籌賑撫則數百萬災黎必致流離失所著加恩撥給本年漕米八萬石盡數改折並將運費水腳等項一併提充賑款以資接濟仍著傳令司局無論何

欵先行借撥銀二三十萬兩撥交地方官協同紳士嚴作霖帶往災區分別迅速散放餘著照所議辦理
該部知道○甲午以吳樹梅爲戶部左侍郎○諭榮祿著在軍機大臣上行走裕祿著補授直隸總督兼
充辦理通商事務北洋大臣所有北洋各軍仍歸榮祿節制並著裕祿幫辦○乙未劉樹堂奏請將固始
縣縣丞移駐黎家寨汝陽縣縣丞移駐水屯寨下部議奏○諭大學士榮祿著管理兵部事務並節制北
洋各軍由禮部頒給關防○諭近因時事多艱朝廷孜孜圖治力求變法自強凡所設施無非爲宗
社生民之計朕鑒勸習時每切兢兢乃不意主事康有爲首倡邪說惑世誣民而宵小之徒羣相附和乘
變法之際隱行其亂法之謀包藏禍心潛圖不軌前日竟有糾約亂黨謀圖頤和園劫制 皇太后陷害
朕躬之事幸經覺察立破奸謀又聞該亂黨私立保國會冒保中國不保大清其悖逆情形實堪髮指朕
恭奉 慈訓力崇孝治此中外臣民之所共知康有爲學術乖僻其平日著述無非離經畔道非聖無法
之旨前因請求時務令在總理各國事務衙門章京上行走旋令赴上海辦理官報局乃竟逗留帶下攜
煽陰謀若非仰賴 祖 宗默佑洞燭幾先其事何堪設想康有爲實爲叛逆之首現已在逃著各省督
撫一體嚴密查拿極刑懲治舉人梁啟超與康有爲狼狽爲奸所著文字語多狂謬著一併嚴拿懲辦康
有爲之弟康廣仁及御史楊深秀軍機章京譚嗣同林地楊銳劉光第等實係與康有爲結黨煽惑

楊銳等每於召見時欺蒙狂悖密保匪人實屬同惡相濟罪大惡極前經將各該犯革職拿交刑部訊究旋有人奏若稍時日恐有中變朕熟思審處該犯等情節較重難逃法網倘語多牽涉恐致株累是以未俟復奏於昨日諭令將該犯等卽行正法此事爲非常之變附和奸黨均已明正典刑康有爲首創逆謀罪惡貫盈諒亦難逃顯戮現在罪案已定允宜宣示天下俾衆咸知我朝以禮教立國如康有爲之大逆不道人神所共憤卽爲戮賊所不容應鶴之逐人有同心至被其誘惑甘心附從者黨類尙繁朝廷亦皆察悉朕心存寬大業經明降諭旨概不深究株連嗣後大小臣工務當以康有爲爲炯戒力扶名教共濟時艱所有一切自強新政胥關國計民生不特已行者亟應實力舉行卽尙未興辦者亦當次第推廣於以挽回積習漸臻上理朕實有厚望焉將此通諭知之○諭已革戶部左侍郎張蔭桓居心巧詐行蹤詭秘趨炎附勢反復無常著發往新疆交該巡撫嚴加管束沿途經過地方著各該督撫等遴派妥員押解毋稍疏虞已革翰林院侍讀學士徐致靖著刑部永遠監禁翰林院編修湖南學政徐仁鑄著革職永不敘用○諭前經降旨擇於九月初五日朕恭奉 慈禧端佑康頤昭豫莊誠壽恭欽獻崇熙皇太后慈輿啟鑾先赴南苑再往天津以次閱操第本年節令較早現在天氣漸寒朕侍奉 慈禧允宜 璇宮頤養以衛興居所有巡幸天津之處著卽停止惟念國家講求武備本期親臨校閱鼓舞戎行近畿各軍業已

次第預備該官兵等平日操演不憚勤苦朕心良深軫念提督聶士成所部武毅軍著賞銀六千兩侍郎
袁世凱所部新建陸軍著賞銀四千兩提督董福祥所部甘軍著賞銀三千兩以示體恤該提督等仍當
督率將士隨時認真訓練總期紀律嚴明緩急足恃毋負朝廷整軍經武之至意○調裕長為甘肅布政
使曾鈺為直隸布政使○調啟秀為禮部尚書以裕德為理藩院尚書○劉樹堂奏前經附奏江豫交
界之碭山虞城等縣匪徒謁運昌等聚眾倡亂等情欽奉 電旨著劉樹堂督飭派出各軍迅即認真剿
辦務將匪首按名擒獲毋任煽惑滋蔓以靖地方欽此又於六月二十日欽奉 電諭張汝梅奏聞悉屬
匪童振清在東豫交界朱家集嘯聚起事曾經東豫各軍會同地方將童振清拿獲所有此股逸匪據稱
竄於江南碭山等處難保不四出蔓延著劉坤一奎俊張汝梅劉樹堂等迅即派兵一體兜拿務期搜除
淨盡以絕根株欽此各等因當經飛飭派出各軍欽遵辦理嗣據鎮營及地方官先後稟報各情詳加
查核匪眾自童四老瓜被獲勢已渙散而餘匪百十成羣尙在附近滋擾幸各屬鄉團嚴整保甲認真賊
不得逞復經歸德鎮總兵武朝聘督率所部會合豫正營官張連三李文慧分途搜捕均有擒獲四鄰保
甲首事亦時有捆送萬運昌由碭山潛回虞境重圍收合餘燄當被哨官牛得山拿獲又匪首蔡玉即蔡
子玉與萬運昌童四老瓜同謀起事該匪自大朱寨一敗單身逃至馬牧集意欲竄入碭山縣境經該汛

外委劉省玉訪查得實帶領汛兵及本處練丁前往捕拿該匪竟敢抗拒格鬪致鎗傷練丁一名幸該外委領眾奮勇直前始就擒獲訊據匪供先擬攻陷大朱寨奪取軍械徑撲縣城幸駐劄該處練軍哨官王翰臣竭力固守至第二日附近駐劄練軍聞風雲集歸德鎮所派隊伍亦星夜馳至王翰臣見兵勢已集就寨中挑選保甲丁壯二百餘人隊伍在前丁壯在後一擁而出其時賊已解聚八九百人見官兵人數無多略不畏懼竟敢開鎗對壘幸我軍鎗礮及遠擊斃數人賊始不敢逼近然猶不肯相退適駐劄廣城馬隊哨官孔昭魁會同廣城知縣田務本各帶兵役營附近保甲壯丁蜂擁而至賊始退敗正迫逐間山東左字營聞風馳至迎頭截擊先將童四老瓜擒獲賊遂大潰童人之亦被王翰臣鎗斃其時高連昌尚在礪山蔡玉亦未就獲餘匪紛紛亂竄敗而不散希冀復歸嘯聚追高連昌蔡玉兩匪首就獲賊勢遂不能復來當飭將先後擒獲及四鄉捆送各匪分別交歸德府及廣城縣就近審訊審出同謀起事抗拒官兵不諱之蔡玉卽蔡子玉張興祥范金梁王位劉義隆張成德劉二楚狗周新林李永張所馬三劉三成王忠義曹機馬二呼衫李起明張景照閻聚泰藏靖振營李六等二十二犯卽令就地正法梟首懸竿示衆高連昌一匪因拒捕傷重先斃於廣城縣獄其餘各犯均飭由歸德府秉公確訊分別稟請辦理查該匪起事之初先分股四出搶劫附近村莊倉卒未及設備所過皆被蹂躪現計被害之家約五十六戶甚

有受傷之人此外尚有聞警逃徙因而蕩其家產者亦復不少已飭地方官查明設法撫恤俾免失所現
在本境一律肅清居民安業如饒實足以仰紓宸厪伏念該匪徒等揭竿起事聚眾雖有千人而其中
裹脅之愚民實居大半故匪首就擒餘黨悉皆星散旬日之內已告肅清此次各員弁迅赴事機一戰而
定辦理尙爲迅速不無微勞足錄合無仰懇天恩俯准將此案在事出力員弁擇尤酌保以資鼓勵出
自逾格鴻施得旨著准其擇尤酌保數員毋稍冒濫仍將匪徒蹂躪之區加意撫恤○內中允劉坤
一奏保已革廣西桂平梧鹽法道向萬鏞交部帶領引見○劉坤一奏倭奏准徐海等屬復被水災擬請
開實官賑捐下戶部議奏○以懷塔布爲都察院左都御史兼總管內務府大臣○丁酉命刑部左侍郎
趙舒翹會同王文韶督辦礦務鐵路總局○諭已革工部主事康有爲學術乖謬大悖聖教其所著作無
非惑世誣民離經畔道之言著將該革員所有書籍板片由地方官嚴查銷燬以息邪說而正人心○諭
昨日有旨將曾銖調補直隸布政使現在裕祿補授直隸總督與曾銖係屬同宗例應迴避甘肅布政使
曾銖毋庸調往直隸直隸布政使著袁昶調補裕長著調補江甯布政使○戊戌裕庚奏奴才使署參贊
隨員浙江試用同知張紹祖等三年期滿開單請獎得旨如所請行○賞袁昶三品京堂在總理各國
事務衙門行走○諭毓寬等奏昭西陵等處緊要急修各工請派大臣查勘一摺著派楊頤迅速前往

敬請助估奏明辦理○諭張汝梅奏災區需賑孔殷援案請截留新漕以資散放一摺本年山東黃河伏
汛期內水勢盛漲泉流匯注以致齊東阿歷城濟陽等縣大堤及濮州平陰肥城等處民埝先後漫決
南北運河亦以洪流漲溢村莊多有淹沒民情均極困苦業經張汝梅籌辦急撫並堵築漫口以工代賑
惟瞬息冬令小民生計維艱自應寬籌賑撫加恩著照所請將該省本年新漕扣除蠲緩及照例撥交各
處兵米外其餘應行運通米石悉數截留並將隨漕輕糶等項按數扣支以備賑需該撫卽飭所屬分別
被災輕重核實散放務使實惠及民毋任吏胥稍有弊混用副朝廷軫念災區至意○諭裁缺湖北巡撫
譚繼洵著毋庸來京卽日回籍○奕劻等奏光緒二十四年七月二十七日奉 上諭侍講學士瑞洵奏
南漕改折有益無損請飭妥議施行及每年豫提折價於津通一帶購米以實倉庾並衛弁屯田裁併改
由地方官徵租各摺片著派奕劻孫家鼐會同戶部妥議具奏欽此八月初三日由內閣鈔出到部八月
初九日軍機處交片奉 上諭刑部郎中英秀奏南漕改折無益有損等語著派奕劻孫家鼐會同戶部
歸入瑞洵摺內一併議奏欽此據瑞洵原摺內稱南漕改折一事張之洞在署兩江總督任內奉 旨籌
議力請全改及奴才續行條陳奉 旨交議仍復中止嗣張之洞於交卸回鄂時復以改折有利無弊專
摺覆陳不知該部如何定議向使輪船未通奴才亦何敢力言改折今則海道暢行南米包米盈溢市廛

官遲朝更商販夕湧顧必苦守藩章牢不可破坐令百萬金錢耗蠹而不思變計豈不可惜以蘇關而論全完本色者不過數縣餘皆統收折色松常鎮太等府州雖有本折兼完之說而完本者更不及三成江寧藩司所屬向係全完折色邇者部庫艱難何如取數百萬中飽歸諸公家又片稱如蒙 特旨施行不特監兌押運各費可裁卽倉漕糧衛等官並可酌汰每年約可省銀五六百萬又片稱當時若照准行此三年中當已節省千數百萬之款等因 等因奉 旨後該次會同妥議竊謂度支者主改折非詳摺出入不足以釋羣疑論根本者重倉儲非綜核盈虧不足以定民志用是參考策牘熟權利弊謹將戶部近年往復之辦法上年改折之情形與夫折放比較之實際京米目下之奇漲斟酌擬議敬爲 皇太后

皇上一一陳之江浙兩省漕米除江北河運十二三萬石外歲約海運一百二十餘萬光緒二十年辦理海防江浙兩省各折十之五六其時 朝廷方以改折南漕飭下兩省督撫籌議光緒二十一年署兩江總督張之洞擬合蘇省州縣收折收本悉仍其舊而由官全行折解議久未定江蘇巡撫趙舒翹電稱開徵在卽是否照舊辦運戶部以本年將次開徵恐難改折電令仍運本色於是張之洞有補救時艱詳陳全折之電大指謂蘇漕全折歲可省運費八十萬石白糧及浙江全折兩湖採買全停剩船挑河各費漕職衛官各項均可酌減歲可省一百五十萬其年十月瑞澂遂有南漕改折利益甚多之奏大指本於

張之洞所議而亦頗採故中允馮桂芬之說戶部先後議覆以近畿連年荒歉糧缺價昂採買不易本年冬漕只可仍運本色明歲或運或折由兩省督撫會籌二十二年春間張之洞復有南漕改折有利無弊籌議辦法之奏大指視前電加詳且謂海運開而河運遂成駢枝商運通而官運轉形勞費官運所窒礙者商運或尙可通行請下部暨督撫核議已而各省電復謂去歲蘇屬頗稱豐稔而辦漕米轉缺少實由別省荒歉出口米多之故產米之區尙且如此京都之米豈不可虞未敢遽斷謂折漕爲大利者蘇撫趙舒翹也謂折漕滋難於蘇民固完本相安已久上年由官折解暫時極宜非久計者浙撫廖壽豐也謂運米一石到通合米價運費修河上倉亦不過四兩專恃商販盈餘運速把掘毫無操價居奇在所不免正恐折價四兩不能買米一石請俟鐵路告成改折者江督劉坤一也於是戶部覆加參考請從緩辦此瑞澂前請折漕一議戶部辦理之始末也二十三年秋間戶部以庫儲支絀現議續借洋款計各倉米數來歲支放尙屬有餘請將二十三年江蘇海運漕糧內暫行減運三十萬石得銀九十八萬餘兩是冬浙撫廖壽豐亦請援案減折戶部以蘇漕既減淮徐災賑又撥河運新漕恐倉儲或絀未經照准本年廖壽豐復疏請改折南漕或減折六成部議俟秋後體察情形現值帑項奇絀戶部正在查照上年辦法酌量折解電行二省查覆米價適該學士以改折爲請此又上年以來戶部辦理改折之始末也自來言折漕者

莫不謂大利所在一經改折歲致五六百萬蓋自嘉慶年間協辦大學士劉世明之已有每石十八兩之說故知州魏源所作聖武記力辨其非而馮桂芬猶主其說近年變時之士率以爲言今詳考其實則有未盡然者折漕大宗曰米價曰運費此外運費而及者曰倉河漕衛等費以米價言之二十年折漕蘇省石折銀一兩五錢零浙省石折銀一兩四錢二十三年蘇省折漕石折銀二兩一錢零蓋因米貴而然計公家多入銀二十餘萬兩亦由該督撫體念時艱內外兼顧而非常例也頃者浙省電報米價現在糧賈較春間石可酌加二錢計石折一兩六錢蘇省電報請照上年折價通計蘇省近年起運米約七十餘萬石常年米價約折銀一百一十餘萬兩浙省約四十餘萬石約折銀六十餘萬兩江北河運米十二三萬石價銀二十餘萬兩有奇蓋米價如此以運費言之蘇省海運石費銀八錢五分江北河運石費銀一兩二錢零浙省海運石費銀九錢五分共銀一百二十餘萬蓋運費如此以通州起撥入倉言之經紀車戶之領款各倉之車價四間之水脚排船毀發修版之費並大小倉官寮廩共支銀二十七萬餘兩蓋倉項如此以運河言之歲修拾修另案各工及河員弁兵歲需直隸北運河支銀三萬三千有奇直隸南運河支銀一萬四千有奇山東北運河支銀四萬九千有奇山東南運河支銀六萬八千有奇江南運河支銀二十萬三千有奇共合銀三十六萬有奇又直隸剿船修造油艚工食之需歲約攤銀八萬三千有奇蓋

運河之費如此以漕官言之漕督以下官屬養廉一萬四千有奇清標七營俸餉六萬二千有奇共銀七萬有奇蓋漕官之費如此以衛言之守備守禦千總俸廉江南十九員銀一萬四千有奇浙江五員銀三千有奇江西二十六員銀一萬八千有奇兩湖十一員銀八千有奇直隸四員銀二千有奇山東三十六員銀二萬六千有奇共合銀七萬四千有奇蓋衛職之費如此其本省漕務例外支銷之款可得而稽綜而論之米價運費之款入於公家者歲約銀三百二十餘萬倉河漕衛之款出於公家者歲約銀八十餘萬今若一律折解一律放銀如張之洞所議折中一兩五錢發放公家歲約餘銀一百七十餘萬如彭學士原議二兩發放則平時米價多不足更須益以運費是公家所餘銀亦不過一百二十餘萬有奇實無所謂五六百萬之數況全行裁汰亦有難言我朝發政施仁無不以體恤輿情為主河海同停則江南沙船及山東沿河窮民津通一帶剝船扛夫同時失業戶部前奏之所論者實非過慮方今非變法不足以自強而非得人不足以變法必詳審乎輕重緩急之宜始可免紛更擾累之弊輕心掉之恐多窒礙此又一折一放兩兩比較之宜求實際也臣等會議之初亦亟以庫款倉儲皆須統籌兼顧或照上年成數折解三十萬石而各倉尙存百萬亦足備一年之蓄今淮徐海被災蒙恩撥漕八萬石水旱偏災各省時有京師爲根本重地自應寬爲儲備乃不至竭蹶於臨時況都下米價自上年日益騰踊爲歷歲所無

以冒採買改折之數蘇省較優而所解三兩有奇之銀不能購五兩內外之米無益兵食先損公家現在改折之議方興糧店已是居奇米價非常陡漲閭閻乏食人心惶惶設會議准折色市問更不知若何情形又京米日昂民兵交慮此亟宜安輯也臣等公同商酌所有本年江浙新漕除撥賑外擬請 飭下該督撫照常起運並求明降 諭旨俾人人知有南糧百萬轉輸流行庶市價不抑而自平人心亦有恃而不恐矣至該學士片稱衛弁屯田裁併改由地方徵租一節歷來論治者多持此議誠宜及時舉辦應令該督撫遵照七月二十九日 諭旨妥為辦理期於公家實有所益於軍民毫無擾累是為至要其英秀所奏亦以價昂為慮現經臣等踴併詳議合併陳明 上諭漕糧為天庾正供關係綦重前據臣工條奏折漕利弊當經先後飭交奕劻孫家鼐會同戶部議奏茲據奕劻等將戶部辦理改折始末詳晰覆奏南漕歲有定額不特兵民生計所關而各省水旱偏災亦時有截留之事京師根本重地必須寬為儲備乃不致竭蹶臨時從前首折漕之利所稱歲至五六百萬者詳加確核實無此數近年各處米價一律騰踴專恃採買亦多窒礙現在改折之議方興糧店即居奇陡漲閭閻艱食人心惶惶其不宜輕易更張已可概見著照所請本年江浙新漕除撥賑外均即照常起運毋庸改折以固邦本而重倉儲餘依議該部知道○恭摺奏承准軍機處劄開軍機大臣會同軍務處戶部會議協辦大學士榮祿廣練兵團以資防守

一摺光緒二十四年二月初一日奉 旨依議欽此相應恭錄 諭旨鈔錄原奏例行欽遵辦理等因承

准此伏維三代井田寓兵於農國強而民靖費省而利長自管仲創爲軌里連鄉之法而民兵始分此後世招募之所祖也唐之府兵近於井田又後世團練之所祖也我 朝綠營皆由招募積久而弊深屢裁而益弱勢不得不藉民力以輔之川中山水奇險門戶森嚴海內險奧之地也而人情浮動輒匪徧伏又海內積亂之區也欲清積亂以固險奧非鄉自爲保民自爲防不爲功是團練爲今之急務而在川省尤不可緩惟治法必須治人始能慎始以圖終查試用道賀綸慶辦理保甲尙能實心任事 臣卽檄派該員會同司道督率成都府知府劉心源悉心體察籌議舉辦茲據該局司道等詳稱川中團練同治初年以團練賊頗著成效日久浸成弩末嗣於光緒二十一年重定新章通飭各屬以團練練住城操習立意甚美旋因遣撤匪患各州縣雖未盡歸廢弛然亦參差不齊此次奉 旨舉辦自須量爲變通以要其成而垂於遠夫川省地廣民稠不難練有額之丁而難除頂替之弊以期切實更番也不難籌暫時之款而難省虛糜之費以期歷久相安也不難集團以壯觀瞻而難隨時以嚴考察使游匪不得充伍也今擬通省各屬州縣分爲三等大邑每年挑壯丁二百四十名中邑百六十名小邑百名卽於各處分東西南北四鄉酌設正副團練以理國務均須確查鄉址姓名年貌先期造冊並仿營制載明箕斗挑丁分配除農忙

時節團而不練外每年均限十冬臘止四箇月內選擇壯丁驗明箕斗赴局輪操更替傳習逐漸推廣
率爲常計川省自三十餘屬州縣練丁近二萬人史番而來數年以後必有可觀此團練所由肇於招募
也至於經費其從前原有之處不另苛派悉仍其舊其無費之處或闕邑統籌或本團自備因地取裁撥
節支用總須不煩不累民樂遵從每月所費若干皆由局中經理通示通衢以免紳董肥私吏胥侵蝕斯
衆情樂於從事不致日久無資然後曉利害以一其心志定賞罰以昭其勸懲如此實事求是或可收效
於將來顧事利弊相承興廢相因欲其久而不做所賴首在得人該州縣等身膺民社自應實力奉行不
得始勤終懈司道等既有督率之責亦惟有破除情面認真查勘能者獎而玩愒者懲以挽回循藉資
補救等情並據籌議章程十條詳請奏咨前來臣詳閱該司道等所議章程尙屬費省功倍法簡意賅承
辦各員果能實力實心二三年間可期衆志成城以輔兵力之不足得 旨知道了卽著奎俊飭屬切實
辦理毋得徒託空言仍屬有名無實○以廷杰爲直隸布政使廷雍爲奉天府府尹萬培因爲長蘆鹽運
使○庚子胡聘之奏 前准總理衙門咨本衙門議復御史李盛鐸奏請各省增設學堂一片奉 硃批
依議欽此鈔錄原奏咨行到臣查原奏內開議令各省於省會建立學堂尅日興辦限六箇月告成等因
遵卽督同司道等察酌情形妥議辦法臣維學堂之興書院名異而實同均爲造就人才之地但期實力

振興不在更新營建在省城向有令德書院專課經史性理諸學臣於光緒二十二年奏請變通書院章程兼課大算格致等學以裨實用奉 旨通行在案本年二月恭奉經濟特科之 諭復與院長前御史屠仁守議添日課四門曰政治時務曰農功物產曰地理兵事曰大算博藝每門分有子目令諸生各視性之所近任占一門逐日記所得仍探本於經史性理諸書以爲經濟根柢雖於應習各種西學尙多未備然如大算博藝農功物產之類現皆分門探討不難漸窺其奧擬請卽就令德書院量加擴充改爲晉省省會學堂書院院長改爲學堂總教習再延訂精於西學者一二人作爲副教習按照京師大學堂章程中西並課以期明體達用肅爲通才其住院各生向由學臣按試各屬拔其高等者調取入院原設肄業生五十名嗣又增博藝生四十名現擬再增三十名共一百二十名作爲定額應添學舍暨副教習等所居房屋以及應行添置圖書儀器零件已飭先行籌借款項克期動工並委員購辦將來再行募捐歸補惟查令德書院常年經費向僅四千餘兩現既改設學堂所需副教習薪餼諸生膏獎一切費用等項較前倍增必須另籌的款以備經費不敷之用擬請援照安徽湖南等省設立學堂奏請撥款成案每年在於釐稅項下酌提銀六千兩撥入學堂俾資應用而期經久得 旨管理學堂大臣并戶部知道○胡聘之奏准總理衙門咨開光緒二十四年四月二十四日奉 上諭總理各國事務衙門奏遵議待耶

樊惠請特設商務大臣一摺商務爲富強要圖自應及時舉辦前經該衙門議請於各省會設立商局公舉股實紳商派充局董詳定章程但能實力遵行自必日有起色卽著各督撫督率員紳認真請求妥速籌辦總期聯絡商情上下一氣毋得虛應故事並將辦理情形迅速具奏等因欽此遵查督省於光緒二十二年五月經臣奏請在省城設立商務總局並奏調籍隸山西之刑部郎中曹中裕等來省襄同辦理查督中大利以煤鐵各礦爲最迭奉諭旨飭令開辦顧欲興礦務以擴利源必先修鐵路以通運道節經臣將招商借款籌辦情形先後奏明在案現在礦務章程業經總理衙門議准卽歸商務局承辦該局紳等已與洋商簽立合同一俟延訂礦師及工程師等來省卽可定期開辦又省南蒲解一帶素產棉花可收紡織之利爰議於絳州之三林鎮設立紡紗織布廠業經購定基址安速興工所訂機器現已由外洋運津惟鍋爐等件過於笨重尙須由水路運至道口再由陸路運赴絳州輾轉需時大約來年當可開辦因現署臬司河東道楊宗濂於機器紡織等事最爲熟悉當卽派令就近督辦以專責成近復議於該廠左近分設軋花榨油兩廠並因陽曲地面素產硫磺擬於省城設立火柴廠均經定購機器一俟秋冬運到卽可次第開辦此外如葡萄釀酒奶油製餅鑄鐵鍊鋼火甄玻璃之類可興之利甚多現尙無力興辦緣商務局股本僅集銀四五十萬兩尙不敷紡織各廠之用仍須廣爲募集而省省道途艱險外商裹

足本省商富見利小而求效速此等創辦之事又多不願附股自非鐵路告成後商股雲集財貨充物籌辦殊不易也。惟有力求振興不憚勞費與該員紳等盡心籌畫勉力經營以期仰副 聖主通商阜民實事求是之至意得 旨戶部知道並著轉行農工商總局查照○李端棻奏竊因時勢多艱需才孔亟或謬探虛聲而以為足磨銀鉅或輕信危言而以為果山忠憤將康有為譚嗣同友保在案本月十一十四等日恭讀 上諭康有為所為誠非夢想所及雖凡被誘惑之人 聖恩寬大概不深究惟其職分較崇知人不明萬難原宥比擬其疏陳請又恐事後檢舉或以引咎為邀 恩之計懷惶迫切病勢益增姑續假期靜以待罪乃泥首數日 朝廷尚無譴責 鴻慈高厚感戴莫名而臣內疚於心終覺難安脫離惟有請 旨治罪以應得之咎以為大臣之濫保匪人者戒理合恭摺自陳不勝伏枕待罪之至 上諭李端棻奏濫保匪人自請懲治一摺該尚書受恩深重竟將大逆不道之康有為等濫行保薦並於召對時一再面陳今據事後檢舉實屬有意取巧未便以尋常濫保之例稍從末減禮部尚書李端棻著即行革職發往新疆交地方官嚴加管束以示懲儆○諭都察院奏遵查四品京堂王照並無下落一摺該員畏罪避匿實難姑容候補四品京堂王照著即行革職著步軍統領順天府五城一體嚴拿務獲並著順天府府尹督飭寧河縣知縣將該革員原籍家產一律查封毋任隱匿○諭嗣後京外各衙門凡有

照例應用清字奏事摺件均適用清漢合璧其各衙門應用清字引見排單亦著寫清漢合璧呈遞○
辛丑調廖壽恆爲禮部尙書以賈舒翹爲刑部尙書○諭出使大臣黃遵憲奏因病請開去差使江南道
監察御史牛盛鐸著撤給三品卿銜以四品京堂候補派充駐紮日本國二等欽差大臣○壬寅以溥頤
爲內閣學士○調李培元爲刑部左侍郎以徐會灝爲吏部右侍郎兼署戶部左侍郎仍在上書房行走
○諭總理各國事務大臣等湖南省城新設的學會保衛局等名目跡近植黨應卽一併裁撤會中所有
學約界說札記答問等書一律銷燬以絕根株著張之洞迅卽遵照辦理○欽奉 慈禧端佑康頤昭豫
莊誠壽恭欽獻崇熙皇太后懿旨自開埠通商以來中外一家宜應不分畛域卽如各國教士之在內地
者迭經諭令各地方官實力保護不啻三令五申各省官紳士民自應仰體朝廷一視同仁之意開誠布
公無嫌無疑以期日久相安乃近日各省民教滋事之案仍不能免四川各起教案至今尙未了結在愚
民無知造言生事輕信讒端固爲可恨而該管官吏不能隨時開導先事防維實亦難辭其咎用特詳加
申諭各直省大員於教堂所在務當嚴飭地方官懷遵迭次諭旨認真保護各國教士往來均宜以禮相
待遇民教交涉之案持平辦理迅速斷結並勸導紳民安分自守毋得逞志肇釁其各國遊歷洋人所到
之處尤應一體保護以盡懷柔之誼經此次降旨之後若再有防範不力致滋事端者當將該管地方官

從重參辦並將該督撫等一體懲處毋謂誥誡之不預也○諭湖南巡撫陳寶箴以封疆大吏濫保匪人寶箴有員委任陳寶箴著卽行革職永不敘用伊子吏部主事陳三立招引奸邪著一併革職候補四品京堂江標庶吉士熊希齡庇護奸黨暗通消息均著革職永不敘用並交地方官嚴加管束○癸卯邊寶泉奏遵撥船廠經費銀十萬兩下部知之○鳳凰林病請解任允之以善聯爲湖北布政使○以俞廉三爲湖南巡撫毓賢爲湖南布政使調景星爲山東按察使以錫良爲山西按察使○欽奉 慈禧端佑康頤昭豫莊誠壽恭欽獻崇熙皇太后懿旨國家振興庶政尤賴封疆大吏深維至計共任仔肩各直省督撫實心任事者固不乏人而養尊處優狃於積習者亦或不免方今海宇未奠內治宜先深宮宵旰焦勞無時不以國計民生爲念該督撫等身膺重寄受國厚恩舉凡飭吏治培人才開利源修武備皆分內應辦之事應如何因時制宜力求實效其各悉心籌畫詳晰奏陳務期實見施行不准空言塞責廣州縣爲親民之官宜重其選近來各省仕途冗雜奔競成風非激濁揚清不足以昭懲勸各牧令中有盡心民事卓著循聲者隨時保奏其貪劣不職聲名平常者亦卽據實糾參至於練兵尤爲急務各省防營不無習氣統兵將帥亟宜振興士氣勉以忠義認真操防而營中剋扣之弊尤宜痛除務期臂指相聯緩急足恃用備折衝禦侮之用總之朝廷勵精圖治尙實政不尙虛文該督撫等惟當破除錮習勉矢公忠方爲不負

委任倘或因循誤貽誤事機責任攸歸自亦難辭重咎也○欽奉 慈禧端佑康頤昭豫莊
誠壽恭欽獻崇熙皇太后懿旨致治之道首在求賢前因舉行新政朝廷明目達聰力祛蘊蔽若概令條
陳時務不免議論紛淆當經申明勅諭凡不應奏事人員仍不許擅遞封奏如其中有足資采擇者亦已
具見施行現在時事艱難萬幾待理拾遺補闕端賴臣僚嗣後有言實諸臣務當共獻嘉謨各抒謫論凡
有關於國家大計者指陳得失不得自甘緘默果係心存君國直言無隱無不曲予優容倘若淆亂是非
徒事攻訐亦必治以應得之罪為公為私自難逃朝廷洞鑒也○諭都察院奏革員在逃請飭嚴拿一摺
已革參將金鳳岐本係交地方官嚴加管束之人前因私行來京在都察院呈遞條陳當經諭令該衙門
遞回原籍茲據奏請該革員住居無定是否聞風遠颺抑或隱匿他處著步軍統領衙門順天府五城直
隸總督江蘇巡撫一體嚴拿解京毋任漏網該衙門知道○諭巡視南城御史英壽等奏拿獲鄰境搶劫
盜犯請交部訊辦一摺所有拿獲之馮舜即隆兒劉興祖黑仔三名著交刑部嚴行審訊按律懲辦未獲
之張傻子即行道著戶部務稟究辦所有會同原拿此案之文武官紳著候刑部定案時聲明請旨○諭
戶部左侍郎兼管三庫事務著付廣漢署理徐會澧毋庸兼署○甲辰 上諭 壽皇殿行禮○以壽山
為黑龍江副都統○胡聘之奏 臣前於遵議武科改制摺內請先在省城設立武備學堂業經奏明在案

查各省地處偏隅局面褊小不特通才難於羅致即圖籍軍械之類亦苦購運維艱創辦誠屬不易惟現當朝廷變法改制力圖自強武備儲才尤爲今日急務斷不容以畏難惜費置爲緩圖當經臣督同司道等悉心籌議查得省城內教場迤東地形寬曠建立學堂甚爲相宜該處舊有太原營參將衙門一所本年四月續裁制兵案內議將原標右營遊擊裁汰所遺遊擊衙署擬令該參將移駐其參將衙署即歸學堂作爲總辦教習文案各員辦公之地此外尙應添建東西講堂飯廳學會及存儲軍械子彈圖籍儀器各所暨各項人役住房堂外另擇操場靶道並於左近附設學營兩座派令各弁兵駐劄隨時練習已飭委員勘估於六月內動工限九月底一律告竣至學堂內應用圖書儀器及各種軍械均須委員赴滬早爲購備其各國新式快鎗快礮雷發較鉅今擇要先行酌購以資應用一面咨調北洋學堂及新建陸軍文武教習各二人來省派令分司教練如果訓練認真著有成效三年後准由臣酌量保獎學生額數擬以一百二十名爲率綜計薪水贍養及一切費用等歲需銀約二萬餘兩必須籌定的款方能持久查湖北湖南等省設立武備學堂均經奏明動用公款督省事同一律請每年在於釐稅項下撥銀二萬兩作爲常年經費至學堂工程及購備一切需款尙多督省並無營舉生息可以提用擬飭該司等先行設法籌借款項俾資趕速興造隨後再行勸捐歸補所有督省籌修武備學堂及酌擬大概辦法謹分條開

續清單繪具圖說恭呈 御覽得 旨管理大學堂大臣並戶部知道單圖併發○欽奉 慈禧端佑康

頤昭豫莊誠壽恭欽獻崇熙皇太后懿旨從來制治未亂保邦未危我朝 聖 聖相承憲度修明盡美

盡善至於厚澤深仁難以枚舉水旱偏災無不止施蠲賑江河漫溢深恐累及窮黎遇有軍務並未抽派

丁役宮中使女亦未選及民間仁民之政又如此宜其上一德朝野相安以期共享昇平之福乃有大

逆不道之徒聚黨密謀辯言亂政而士大夫中竟有不明大義者援引匪人心懷叵測言念及此能勿憤

懣朝廷屢示寬大姑免株連爾諸臣等受恩深重具有天良際茲邪說暴行之際自當以名教綱常爲己

任以端學術而正人心共矢公忠勤修職業各部院堂司各官均應常川進署認真辦事痛戒因循力求

振作事無鉅細凡有益於國計民生者皆當實事求是洗滌沓之習至於物力匱乏理財之道固在開

源尤貴節流凡在官者皆有表率士民之責務宜敦崇節儉力戒奢靡但使官場能省一分浮費即可爲

閭閻多養一分元氣藏富於民誠爲根本至計自此次宣諭之後中外臣工皆當激發忠忱各思奮勉仰

體朝廷殷殷垂訓之意凡事必講求實際勿託空言以期共濟時艱同臻上理予實有厚望焉將此通諭

知之○諭會章奏敬陳管見一摺據稱逆犯康有爲結黨煽亂外間浮言頗有以誅戮悉屬漢人遂疑朝

廷有內滿外漢之意等語前楊深秀等黨附康有爲同惡相濟情真罪當特明正典刑並諭以此外概不

株連朝廷執法豈有滿漢歧視之理今會章妄以私意揣測果何所據而云然大小臣工通達事理自不致爲浮言所惑總之有犯則懲國家一秉大公毫無成見也○諭吳懋鼎著撤銷三品卿銜毋庸管理農工商務總局事務○諭張百熙保送康有爲使才實屬荒謬著交部嚴加議處○諭工部筆帖式志銡擅騙招搖不安本分著卽行革職以儆官邪○諭詹事府少詹事王錫蕃工部員外郎李岳瑞刑部主事張元濟均著革職永不敘用○諭陳寶箴昨已革職永不敘用榮祿曾經保薦茲據自請處分榮祿著交部議處○乙巳以徐承煜爲禮部左侍郎○諭軍機大臣等前據御史宋伯魯奏參兩廣總督譚鍾麟臬司魁元等貪劣各節當諭令陳寶箴查奏現在該撫業經革職卽著俞廉三於接任後按照所參逐一認真確查據實具奏並著咨行陳寶箴將所奉諭旨全案卷宗迅卽移交以憑查辦尋俞廉三奏原參譚鍾麟魁元各節查無其事裴景福官聲尙好均免置議候補知縣李家焯前帶卓勇約束不嚴請交部議處候補知府王存誓前經廣東藩司岑春煊列款詳參請 敕下兩廣總督譚鍾麟按款嚴切確查奏明辦理得 旨李家焯著交部議處餘依議○諭軍機大臣等前據太僕寺少卿岑春煊御史馮錫仁先後奏參廣西巡撫黃槐森臬司蔡希邠右江道黃仁濟因循玩愒營私納賄等款當諭令陳寶箴查奏現在該撫業經革職卽著俞廉三於接任後按照所參逐一認真確查據實具奏並著咨行陳寶箴將所奉諭旨及

全案卷宗移交核辦○欽奉 慈禧端佑康頤昭豫莊誠壽恭欽獻崇熙皇太后懿旨國家以四書文取士原本先儒傳注闡發聖賢精義二百年來得人爲盛近來文風日陋各省士子往往剽襲雷同毫無根柢此非時文之弊乃典試諸臣不能釐正文體之弊乃論者不揣其本輒以所學非所用歸咎於立法之未善殊不知試場獻藝不過爲士子進身之階苟其人懷奇抱偉雖沿用唐宋舊制試以詩賦亦未嘗不可得人設論說徒工心術不正雖日策以時務亦適足長鬻競之風用特明白宣示嗣後鄉試會試及歲考科考等悉照舊制仍以四書文試帖經文策問等項分別考試經濟特科易滋流弊並著卽行停罷朝廷於論才大典斟酌至再不厭求詳嗣後典試諸臣及應試士子務當屏斥浮華力崇正學毋負朝廷作育人才之至意至富強之術固當講求惟必須地方官認真舉辦方不至有名無實所有農工商諸務亟宜實力整頓惟總局設在京城文牘往還事多隔膜一切未能靈便仍應責成各督撫在省設局分門別類詳加考核俾有實際著直隸總督選派委員督率辦理以爲各省之倡京城現設之局著卽裁撤○欽奉 慈禧端佑康頤昭豫莊誠壽恭欽獻崇熙皇太后懿旨著步軍統領衙門等專派委員督率得力弁兵將各國使館一帶地方晝夜巡邏認真保護並彈壓一切倘有閒雜人等藉端滋事立卽當場拿獲懲辦不得推諉致有疏懈○諭著旨亂政最爲生民之害前經降旨將官報局時務報一律停止近聞天津

上海漢口各處仍復報館林立肆口逞說妄造謠言惑世誣民罔知顧忌亟應設法禁止著各該督撫飭屬認真查禁其中主筆之人率皆斯文敗類不顧廉恥卽飭地方官嚴行訪拿從重懲治以懲邪說而靖人心○諭奉天府府丞何乃瑩奏京師城垣諸多傾塌 壇廟園牆基址均有刨挖情形請一律修整等語著工部查明具奏○丁未欽奉 慈禧端佑康頤昭豫莊誠壽恭欽獻崇熙皇太后懿旨湖北廣東雲南三省巡撫現經裁撤地方一切事宜總督能否兼顧究竟巡撫是否可裁著軍機大臣會同吏部妥議奏○欽奉 慈禧端佑康頤昭豫莊誠壽恭欽獻崇熙皇太后懿旨聯名結會本干例禁乃近來風氣往往私立會名官宦鄉紳罔顧名教甘心附和名為勸人向善實則結黨營私有害於世道人心實非淺鮮著各省督撫嚴行查核拿獲入會人等分別首從按律治罪其設會房屋封禁入官該督撫務當實力查辦勿得陽奉陰違庶使賊黨寒心而愚民知所儆懼將此通諭知之○欽奉 慈禧端佑康頤昭豫莊誠壽恭欽獻崇熙皇太后懿旨為治之道以得民心為本頻年以來海宇多故物力維艱小民困苦情形深宮時座軫念各直省督撫皆有保衛民生之責務當加意撫循州縣為親民之官尤當慎選循良盡心民事保甲團練皆以綏靖地方審時度勢勿得藉端滋擾水利蠶桑以及製造販運有資民間利賴者皆因地制宜隨時教導務期家給人足民心固結以逕咸和而銷隱患將此通諭知之○欽奉 慈禧端

伯唐頤昭徽莊誠壽恭欽獻崇熙皇太后懿旨大學士榮祿奏開用關防日期一摺覽奏均悉現在時事艱難以練兵爲第一要務是以特簡榮祿爲欽差大臣所有提督宋慶所部毅軍提督董福祥所部甘軍提督聶士成所部武毅軍候補侍郎袁世凱所部新建陸軍以及北洋各軍悉歸榮祿節制以一事權該大臣務當統率有方認真督練隨時稽核毋稍疏懈俾各軍悉成勁旅用副朝廷整飭戎行至意○諭御史攀桂奏玉田縣屬水災甚重請飭查賑一摺本年七月間直隸玉田縣屬霪雨爲災黑龍雙城二河同日漲發小民流離凍餒殊可憫著裕祿遴派委員迅速查明籌辦賑撫以蘇民困○己酉命裕祿會同張之洞督辦蘆漢等處鐵路○庚戌以戴夢爲通政使司通政使○予錢應溥病假一月○劉樹堂奏於光緒二十四年七月十四日欽奉 電諭現在東河在山東境內者已隸山東巡撫管祇河南河工由河督專辦今昔情形確有不同東河總督事宜卽當併河南巡撫兼辦等因欽此又於十六日欽奉 電諭河南河工已併歸巡撫兼辦劉樹堂著無庸著將接辦情形先行電奏等因欽此 臣於接辦後當卽電請總理衙門代奏並聲明事關裁撤歸併電奏恐難詳晰容俟另摺續陳等因在案竊維河督衙門公事牽涉兩省當經裁併之初必將兩省牽涉之處先與清釐分晰彼此乃不至糾紛 臣連日詳查舊卷體察情形總議租有端緒除山東運河前已電奏請歸山東巡撫兼管外所有接辦後應辦事宜約有數端

請爲我 皇上詳晰陳之一山東河督衙門額設督標將弁員缺請就近歸山東撫臣酌量辦理也河督既裁則督標額設副將以下等員弁其無防汛之責者似應一體裁撤河督衙門本在山東濟寧州城內標下各員弁亦俱留該處供差應由山東撫臣就近查明省標實缺各員有無防汛之責分別辦理其餘河標左右及城守黃運各營凡在山東境內請併歸山東撫臣主政其在豫省之懷豫兩河歸臣主政一河東總督關防由臣恭繳查銷其督署敬存 欽頒之王命旗牌及舊有文卷亦請就近歸山東撫臣查明分別辦理也臣接辦之日卽准東河督臣任道鎔將東河總督關防隨同文卷一并齎交前來當卽接收封固具文送部查銷其王命旗牌等件據稱敬存濟甯本署應由山東撫臣查明恭繳至河工文卷存於濟甯者居多臣已咨商山東撫臣委員逐一檢查凡係山東河工公事剔出留存係河南河工公事卽咨送來豫以備查考一東河需次人員擬請查照兩省之缺分多寡有無分別令歸山東河南候補也查東河候補人員係兼補山東河南兩省之缺現既將河南河工併歸巡撫兼辦已與山東區分爲二各項需次人員自應分歸兩省候補擬咨商山東撫臣查明兩省缺分候補班次就某省某班缺分之多寡分某省某班候補之人數俾昭公允至間官一項豫省所無惟運河始有此缺此外尙有未入一班豫省河工實無可補之缺應一併咨送山東敘補以昭核實一查明河南山東兩省例應迴避本省人員分別

令其迴避也查東河候補人員多有籍隸山東南者向章籍山東者不補山東之缺籍河南者不補河南之缺現議查明各班候補分歸兩省應先儘此項例應迴避人員先行分別迴避俾免向隅已由臣咨商山東撫臣辦理一請嗣後分發人員分東河者專駐山東另分河南河工爲豫河也查河南河工現歸巡撫兼辦山東運河已由臣奏請歸山東撫臣兼管東河南省已分爲二將來聖鑒指省各項分發人員自不得仍用東河名目擬請仿照河北河之例將東河名目專指山東另分河南河工爲豫河以示區別一河工一切應辦事宜請仍按照舊章辦理也查豫省河工自前河臣許振禕改章以後工款皆能核實是以歲慶安瀾任道鎔接任以後力求撙節每年均有贏餘臣擬一切仍照向章辦理於工程則更求核實於款項則再求撙節以仰副 聖主慎重河工力戒虛糜之至意其河督衙門公事現既併歸臣署兼辦除酌留辦公書吏數名外其餘則應裁者裁應併者併查許振禕原奏各衙門公費係出於常年額款之中未便區分但浮費既減則額款不增而增實於工程庫款兩有裨益微臣受 恩深重值此籌款維艱倘能庫款多節省一分卽於微臣之心力亦稍盡一分第接辦之初殊難懸計應俟辦理一年以後察核情形實能節出款項若干再行據實呈報下部議奏○劉樹堂奏河南河工分隸兩道八廳文武各汛地現責成巡撫兼辦而河工情形與地方不同臣擬將一切應辦事宜及各項需次人員仍照向章

分別地方河工兩項辦理惟查市衙門關防並無管理河工之責應否將巡撫關防改鑄增入兼理河務字樣抑另鑄關防撥給以專責成而昭信守之處相應請 旨遵行得 旨著改鑄兼理河務字樣禮部知道○欽奉 慈禧端佑康頤昭豫莊誠壽恭欽獻崇熙皇太后懿旨國家振興庶務凡有益於國有便於民者均應隨時興辦以植富強之基前因商務為當今要圖特諭劉坤一張之洞就沿江沿海一帶先行試辦茲據張之洞奏稱應於上海漢口設商務局以聯絡川陝河南雲貴湘粵等處工商講求工廠製作商貨銷路等事並酌擬辦法等語商務為利源所繫創辦伊始不在恢拓規模而在考求實際現在財力未裕所需經費無論官籌商借皆當以核實為主毋稍虛糜該督所擬辦法八條均尚扼要武漢上游為商務大宗張之洞責無旁貸即著督率在事各員加意講求認真經理隨時會商劉坤一與上海局聯絡一氣務期中外流通確有成效不得徒飾空言致負朝廷力圖振興至意○諭內務府奏護軍統領請坐補護軍各缺請旨懲儆一摺內務府三旗護軍守衛禁門出入禮從差務重要遇有缺出應由該統領等照章分別班次稟由該管官挑補以昭慎重乃本年七月間出有護軍各缺該統領等並未照章聲明率請一律坐補實屬辦事糊塗跡近朦混所有鑲黃旗護軍統領順保正黃旗護軍統領通慶正白旗護軍統領恆裕著一併交部議處○是月義大利國新簡駐華使臣馬迪訥抵任